



# आमा जलै धड्की धड्की







-- लेखक

बस ए मुक्के पैंडे, बस ए आई मनजल  
इस ईखी नै साढ़े 'शा के नइ कराया





शमा जलै  
की  
धड़की-धड़की

नरसिंह देव जम्वाल

# कमला प्रकाशन, भलवाल, जम्मू

पनछान



कवि



पहली बारी

अगस्त १९६८



प्रकाशक :

गिरिराज सिंह जम्वाल



मुद्रक :

आर. सी. प्रिंटिंग प्रेस,

अप्पर बजार, जम्मू



मुल्ल : २-५०

नां :

नरसिंह देव जम्वाल

नां :

भलवाल, जम्मू

जन्म :

२८ फरवरी १९३२

कम्म :

सरकारी नौकरी (पोलीस)

पता :

जिला पोलीस लाईनज,

जम्मू तवी

साहित्यिक कम्म (डोगरी) :

नमीं कविता-नमे रस्ते :

कविता संग्रह

धुखदे गोहूटे :

कहानी संग्रह

ठारमां रोज :

रला-मिला

शमा जलै की धड़की-धड़की :

(तुन्दे हल्यै 'च)


गजल संग्रह

सांझी धरती-बखले मानु :

नावल  
(छपने आला)

इसी छापने आस्तै मिली दी आर्थिक सहायता आस्तै

लेखक कलचरल अकैडमी दा आभारी ऐ ।



भेटा...

जीवनै दे  
उने गुप्प न्हेरें गी  
जिने  
मिगी सदा सिद्दी ते सोह गी  
गैं धरने दी जाच दस्सी...



ए डोगरी दे साधकें दी साधनां दा फल ऐ जे अज डोगरी कतावें  
 दी गिनतरी सौ कोला बदी गेदी ऐ । डोगरी साहित्य-क्यारी 'च अज  
 भांत-सवांतड़े फुल्ल खिड़ियै चीनें कूह्, टें अपनी बाशनां खलारा दे न ।  
 इन्ने थोड़े चिरै 'च नेआ नरोआ, छैल ते सरोखड़ साहित्य रचियै  
 डोगरी दे ए सब्बै साधक सराह्ना ते श्रद्धा दे पात्र बनी गेदे न पर  
 अपने पाठकें दे हत्थें 'च डोगरी गजलें दा पहला संग्रह टकाने दा सेह्-रा  
 नरसिंह देव जम्वाल हुन्दे सिर रहौग । मनो-मन में बी पसोआ करनां  
 जे सेह्-रा ते नईं पर छड़पाले आला इक-लड़ा मोतियें दा हार मेरै सिर  
 बी रहौग की जे मिगी डोगरी गजलें दे पहले संग्रह लेइ दौं शब्द लिखने  
 दा मौका थोआ ऐ ।

'गजल' नैं ईरान 'च जन्म लेआ ते कोई दौं सौ बरें पहले हिन्दो-  
 स्तान आइयै उर्दू भाशा दा चोला पाई लैता । उर्दू शायरें बी, बिन्द'क  
 अदला-बदली करियै, ईरानी गजलें' दी गै पैरवी कीती ते इस चाली  
 'बजन', 'काफिया' ते 'रदीफ' उर्दू गजलें दी जान नईं तां इमान जरूर  
 बनी गे । इस्सै चाली भारत दी दूई भाशाएं ते उप-भाशाएं 'च बी  
 गजलें नैं इयै रूप लइयै गें टकाई ।

इस संग्रह गी पढ़ियै दमागै 'च पहली इयै टनकोर लगदी ऐ जे  
 जम्वाल होरें गजलें दे इस रूप गी बिगड़न नईं दिता । एदे लेई इनें  
 गी किन्नी तपस्या करनी पई होग इस गल्लै दा अन्दाजा ए गजलां पढ़े  
 छुट्ट लाना बड़ा औखा ऐ ।

—जितेन्द्र शर्मा



## चौथी गैं—

साहित्यक पैडे 'च मेरी ए चौथी गैं इक गजल-संग्रह दे रूप 'च अज तुन्दै सामनै आइ ऐ ।

साढ़े देसै 'च गजलै गी उर्दू नै गैं लोकप्रयता दिती ऐ, इदा कारन ए ऐ जे उर्दू तकरीबन सारे-देसै 'च बोली ते समझी जाने आली सांझी भाशाएं 'चा इक ऐ ! 'गजल' शब्द दा मतलब ऐ जनानी ज्ञात वारै कोई गल्ल करनी व ए इक ऐसी कविता बी ऐ जिदे 'च हिरख, शलैपा, मिलन, विछोड़े, तांग, रीझ, शुआले, वेदन, मेदां ते वसोस, कलपना ते यथारथ 'च रंगोई दी आसा-नरासा, सब किसै दी झलक इक्कै थार लव्ही जन्दी ऐ जिदा केन्द्र - बिंदू इक्कै हुन्दा ऐ ते ओ ऐ 'इश्क' । समे दे कन्नै - कन्नै जित्थे हर चीजै दा बदलना सभावक ऐ उत्थे इक लम्मी वरेस भोगने प्रैत अज्जै दी गजल बी कदै कदै रूपै ते इश्कै दे मस्ताने बंधन तरोड़ियै वाहूर झांकी लैदी ऐ । जमाने दे नित नमें बदलदे रंगे कन्नै इवी कुसै वेलै अपना बना शंगार करी लैदी ऐ । मेरी गजलें 'च ए दूआ रूप गैं मता प्रधान ऐ व' इस हद्द तक जे इदी मान-मरयादा गी कोई ठेह नइ लगै ।

गजलै बारे 'च, ते खास करी डोगरी 'च लखोने आली गजलै बारे' च डोगरी साहित्यकारें 'च मती सारी परचोल रहींदी ऐ । ते बदकिसमती कन्नै आम नशाना मिगी गैं बनता पया ऐ । नइ चाहने पर बी किश वशेश ठुकाइयें दे उत्तर देना मिगी इक फरज सइ होआ तां जे मनै 'च बस्से दे गलत भरम मिटी सकन !

पहली गल्ल ; असें गी गजल देन गैं उर्दू दी ऐ इस आस्तै इदे

च ओकड़ा रंग ते जरूर गै होना चाइदा ऐ । 'गजल' लिखदे बाकी, भाएं अस कुसै बी भाशा 'च' लिखचै, उदे नियम इयां गै अपनाने पौंदे न जियां कुसै बी मुखै दी धरती पर पैर रखदे गै उदे कायदे-कनून दा आदर मान करना पौंदा ऐ ।

दूई गल्ल ऐ 'शबद जाल'; तां भाशा सम्बंधी मेरे विचार बिलकुल साफ ते सांभे 'न । ना कुसे कर्न मती मित्रोचारी ते ना मइ-घोड़े आला बैर । अज्जै तक ते मैं इयै दिखया ऐ जे हर भाशा समें दी लोड़ै मताबक, अपनी चादरै गी दूइयें बोलियें दे गिने-चुने दे ते प्रचलित शबदें दी मगैश लांदी चली आवं करदी ऐ ते इदे कन्नै उंदा रूप मेशां उगड़दा गै । इक डोगरी लेखक होने दै नातै मेरै सामनै सारे कोला पैह्लें डोगरी दा अपना रूप ते सुभातम आंदा ऐ ते फी उसी होर सजाने सुआरने आस्तै जे कुसै दूइ भाशा दा कोइ शबद लैने दी लोड़ पई गै जा तां मैं सदा ए दिखनां जे केड़ा नग कुत्थें शैल बनकदा ऐ, उयै लाइ लैनां । मेरी गजलें 'च' डोगरी भाशा दा उयै रूप डलकदा ऐ जेड़ा अज्जै दा डोगरा पढ़ै लिखै ते बोलै करदा ऐ । ते ए इक बनभाइ दी गल्ल ऐ जे लोक-भाशा 'च' सरल ढंगै कन्नै आखी दी गल्ल वड़ी तौले उन्दे दिलै-दमागै तगर पुज्जी जन्दी ऐ । ए गल्ल अज्जें तक मेरी समझै शा बाहूर ऐ जे उर्दू दे दौं शबद आइ जाने करी जेड़ी रचना उर्दू दे मती कोल सइ हुन्दी ऐ, हिन्दी-संस्कृति दे कइं शबद आइ जाने करी की नइं अक्खरदी ?

त्री गल्ल ऐ डोगरी भाशा दा लिखत रूप । इदे बारे 'च' इक मैं गै नइं तकरीबन सारे गै लेखक ते साहित्यक रुची रक्खने आले इक



चक्कर 'च फसे दे न । डोगरी साहित्य दी अजें उमर गै के ऐ, आपू जियां-जियां मुशकलां अँडन, उन्दे उपा वी बनदे जाडन । ए फिकर भाशा-विज्ञानियें पर छोड़ियें में इन्ना गै आखंड जे वशक देवनागरी लिपी डोगरी दे सुआत्मै गी किश-किश सखाइ गइ दी ऐ व' फी वी अजें मतियां अड़चनां न जिन्दे करी लिखत रूप 'च भेत-भाव ऐ ।

इस कतावै 'च औने आली इयै नइयां इक-दो अड़चनां ए न :—

(१) आम डोगरी शब्दें 'च 'ह' दी अवाज तकरीबन 'अ' कन्ने रलदी-मिलदी सइ होंदी ऐ । व इक ते ओ पुरन-रूपै 'च 'अ' नइ होंदा दूए लिपी ते शब्दै दे साहवें 'ह' गै लिखना जरूरी होइ जन्दा ऐ । इस आस्तै में ए अक्खर 'ह्' करी लिखे दा ऐ ।

(२) 'मेरा, तेरा, जेड़ा' ए न्हे शब्द उर्दू आला लेखा दौं बजने 'च बन्ने दे न व' उर्दू 'च 'जेर' अलामत इस बजनै दा फरक दस्सी छोड़दी ऐ । देवनागरी 'च ए अलामत 'ि' ऐ व' डोगरी शब्दें 'च ए किश जचदी नइ । जदू तक इन्दा कोइ रूप निश्चत नइ होइ जन्दा में हिन्दी आल लेखा ए शब्द मूज रूपै 'च गै लिखे न जिनें गी पढ़े बाकी, उस गजलै दी तखती समझियै पढ़नै पौग । इयां गै, "कोइ, नइ, गया, कइ" वगैरा शब्दें दा बजन वी थारै अनुसार, उर्दू जां हिन्दी दे बजनै मताबक पढ़ियै गजलै दा अनंद लैता जाइ सकदा ऐ ।

चौथी गल्ल; जिनें लोकें दा ए मत ऐ जे डोगरी गजल पर उर्दू गजलै आला लेखा पबंदियां नइ लाइयां जाइ सकदियां ते नां गै लाइयां लोड़चदियां, उन्दे अगै इन्ना गै नवेदन ऐ जे गजलै दी रूप-रेखा जां पबंदी ते मान-मरयादा (सरलता, सूखम-पुता बजन, बंदश, काफिया-रदीफ आदि) पर नइ चलने आली रचना गी 'गजल' नां कन्ने जोड़या

गै की जा । कोइ होर शैल नयां ना तुप्पी लैना चाइदा । 'गजल' सिरलेख आखदे गै गजलै दे वशेश गुन रचनां 'च नइं होन तां सौ फलसफा, डूगापन, शब्द-जाल, अरथ-भाव की नइं होऐ इक अधूरा प्रयास ऐ । आं जित्थें तक वैह्-रें' (तखती) दा तल्लक ऐ नमियां तुप्पियां जाइ सकदियां न जिन्दी मसाल कदे-कुतै, हिन्दी, पंजाबी जां डोगरी 'च लब्बी जन्दी ऐ ।

इनें सारी गल्लें, अड़चनें, टोको-टोकी ते विरोधै प्रैन्त बी मिगी ए गौह् ऐ जे मै गजलें दा पहला संग्रह डोगरी साहित्य गी भेटा चाड़ै करनां ए यकीन रखदे होइ जे इदे 'च भरोचे दे बट्टे गीटे ते छनकर-रोड़ें 'च कुतै-कुतै सुग्ने-चान्दी दी कनी बी ऐ । ते आशा रखनां जे डोगरी दे सात्थिकार, आलोचक ते भाषा - वज्ञानि हुन निरपक्ष होइयै इस पासै बी विद धियान देंडन तां जे इस वेले तोड़ी भाषा 'च औने आलियां अड़चनां ते भेत-भाव छड़े टोको-टोकी आस्तै गै नि वरतोन, इन्दी परख पड़ताल करियै भाषा दा स्तर ते इदे 'च इकरूपता आई जा । भाषा समबंधी पबंदियें दा पालन करना कवियें आस्तै होर बी जरूरी होइ जन्दा ऐ की जे शब्दें दा ठीक-ठीक उच्चारन इक कवि गै दस्सी सकदा ऐ । इयां गै कुसै टकोदी कविता जियां, कुंडली, मुकतक, चौपदा, छंद, दोहा जां गजल आदि, दी रूप-रेखा पर लिखदे होइ उन्दे सम्बंधी नियमें गी नइं अपनाने आले कवियें गी लोड़चदा ऐ जे मुकत-छंद जां आम कविता दा प्रयास करन, ब ए गल्ल जरूर चेतै रखी लैन जे इन्दे बी किछ असूल ऐन । मेद करनां जे मेरी ए निक्की नई भेटा भाषा दे स्तर ते इक-रूपता पासै पहली-गै दा कम देग ।

नरसिंह देव



कन्हे विसले फनुके हे जो इस बागी 'प भुल्ली गे  
लऊ कलियें दे सुक्की गे गड़ाके फुल्ल भुल्ली गे

दिलै दी अग्गी नै लउऐ दे तोपे पानी होइ सिमके  
बत्हेरे अक्खियें रोके ब' ओ मुंह-जोर डुल्ली गे

बरेसै शा जेड़े पैडे हे पनछानु अज ओ दिक्खो  
मेरे डिगदे गै नजरां फेरी गे पनछान भुल्ली गे

जदू तक मीटियै टुरदे रे सब अपने बझोंदे हे  
दनां दिक्खी के गैं पुट्टी तां सारे भेत खुल्ली गे

चलो माड़े दिनें अपने बगाने दा ते थौ लगा  
बत्हेरे गुबर खुल्ली गे, बत्हेरे भार उल्ली गे

तेरा औना हा मेरी गोद गजलें नै भरोची ही  
तेरा जाना हा दिखदे-दिखदे सारे शेअर भुल्ली गे

किश रौलें, किश चुप-चवीती  
जो बीती सो बाह-बाह बीती

कुन जरनीक ऐ मेरे साई  
सूंक नि सुट्टी सी नई कीती

दोश इदे बिच के हिरखै दा  
ए सब बिपता अपनी नीती

ओठें नई सइ नजरें गै सइ  
मतलब हा पीने नै पीती

लेखा अपना अपना देना  
चंगी कीती, माड़ी कीती

हर थां मेरा इशक बंदोआ  
के अनहोनी मैं ही कीती

करग शतान कदै नई ईयां  
जो आपु 'चें मानुएं कीती

जद इक मिट्टी शा सब उपजे  
फी ए छिडे अपनी नीती

✱

हर अरमान सै धुखदा-धुखदा, हर आह-निकलै अड़की-अड़की  
आस नमानी लीरां-लीरां, मिली नि मनजल भड़की-भड़की

फुल्लें दे हासे भरमा दे, बिज्ज डरा दी कड़की-कड़की  
जीन नि हुन्दा साह् नई निकलन हिरखी तंदें लड़की-लड़की

दौन्नें सइ ऐ रौं दुनियां दा, दौन्नें सार समें दी भाखी,  
हिरख रवै तां बचदा-बचदा, रूप चलै दा मड़की-मड़की

अंधी झक्खड़ बनझाए दे, जोश शुआले बी सब भाखे  
अंत सइ जद परवाने दा, जोत जलै की धड़की-धड़की

सोह्ल जिन्दू सौ जालो-खाले, अंत फिरी किश न्हेर-मन्हेरा  
पासे दै बस जीवन जूआ, बीती आयू छड़की-छड़की

स्वारथ दे न्हेरे बिच मानु, अपना गल घोटै दा आपू  
अपने गै लउए दा चसका, हिरस हड्डी गी रड़की-रड़की

अज कुन मिथदा घट अपने गी, अज कुन मनदा रोब कुसे दा  
हत्थ के औना पड़की-पड़की, कुसी सनाना बड़की-बड़की





कदूँ साथ लेती जिनें चा नै जोड़ी  
ब 'ए लालसा नइ गई मरने तोड़ी

तुसें गी देऐ करने तुं दे गै लाहमे  
जे मुल्लां दी दौड़ ऐ मसीतै गै तोड़ी

मैं खुश हा चलो मी उदा गम गै थोआ  
गलां दे रे सब जान हिरखै 'च रोह्, डी

कदूँ आपू मनजल उदे कोल दुक्की  
जिनै बत्त दिखदे गै आह्, लइ तरोड़ी

तुसें घोखो-घोखी दी ओ खो निं बदली  
असें जखम सीने दी आदत निं छोड़ी

ए साढ़ा गै जिगरा हा बनझाइयै फी बी  
तुसें जेकी आखी असें नइ ओ मोड़ी  
असें आपू-बिच्चें दे झगड़े निं मुक्के  
उनें गे पजाई छोड़ी ऐ चन्नै तोड़ी

इयै शुकर समझो अजें तक जियै ने  
नितां कसर बाकी कुसै कोकी छोड़ी ।





समें पर कैस्सी रोह् करना, समां कोदा सदा होआ  
कसाला ऐ तां वस इन्ना, कदै साढ़ा ए नई होआ

पछानन सार ब्हारै दी जिड़े वसदे न बागें 'च  
मिगी सुक्के दा इक दुनखर, कुतै सहारे तै नई थोआ

मलम हा जहार जखमें दी उदा निक्का न्या शारा  
“ए के वसरे न”? इन्ना बी कदै ओदे शा नई खोआ

दिलै दी हर अड़ी मन्नी तां इस हालै 'च अस पुज्जे  
व 'इक ए दिल जो साढ़ा हा कदै साढ़ा गै नई होआ

वनांदे लोक कियां न ए तसवीरां लऊ कन्ने  
असें लक्खां पछूके मारे इक तोपा बी नई थोआ

झियाली पर बड़े रामै नै मेरी लाश जाइ चड़दी  
ओ लोका-चार गै पुछदे “कुंदी अरथी ए कुन मोआ?”

✱

तेरी मैहफला अस इयां होए खज्जल  
 जे बहौना वी मुशकल हा उठना वी मुशकल  
 जे होग हिरख मुच्चा तां थोई जाग मनजल  
 मेरे मैहरमां बिंद करयां नि खेचल  
 जे ए आस होइ जा उबी होग शामल  
 खिड़ी जाग अरथी पसोडन ए कोतल  
 फटे किन्ने कुरते मली कइयें भुब्बल  
 के चरज ऐ मेरी साध जे होग निशफल  
 मेरा सबर गै मेरे हिरखै दा साखी  
 में अनजान भोला मैं भाखे नि छलबल  
 ए थो ऐ जे पीती ते फी थौ नि रया  
 ओ रइ गिट्टै-गिट्टै जां पुज्जी ही गल-गल  
 मेरा दोश इयै हा बेवकत आया  
 पता के हा राँ उन्दा बदले दा अजकल  
 तेरा असर हा जां मेरी बेनियाजी  
 ना दोखी पछांते ना रइ याद झलमल  
 पड़ां होग बेशक्क ए कुत्थें ऐ मनजल  
 चली चल मनां तुं बदी चल, चली चल

✱

जदूँ बी पैर उठदा ए जदूँ कोइ गें पटोंदी ऐ  
तेरी मैहफल गै सुझदी ऐ तेरे रस्ते गै टोंहदी ऐ

बत्हेरे तिलक-धारी पनत, मुल्लां वांग देने तै,  
ब 'लो नूरानी हिरसै दे, निं परदे 'च डकोंदी ऐ

निं दुनिया दी कुसै चूका, निं मन्दर गै निं मैखानै  
मैं जिस मस्ती दा लोभी आं तेरै बेड़ै बडोंदी ऐ

इनें दौं झीलें पर मैं के करां, कुरवान तुस दस्सो  
ए मेरी जान बी मी डुब्बियै इन्दे 'च थोन्दी ऐ

हजारां घिरदे फी बरदे मुकी जन्दे न ए डिगल  
ब 'मुंह सिप्पै दै पौने तै कनी टामी गै होंदी ऐ

पली जो लैहरें बिच बेड़ी उसी के डर तुफानें दा  
ओ दिखदी लैहरें गी हस्सी जदूँ बदली घनोंदी ऐ  
ओ हर थारै जे ए सच ऐ तां फी मन्दर मसीतां के  
ए भूठ ए जे तां दुनियां की उसी फी तुपदी रहौंदी ऐ

मी सई होंदा उदे तक पुज्जने दा तुएँ इक रस्ता  
मलाटी तेरी गैहली गै हर इक म्हैन्तै नै होंदी ऐ

✱



कोल तुस ओ ते तुन्दा स्हारा ऐ  
जीन जीन्नां, ए जीन प्यारा ऐ

चेतै अज बी 'न पिछले रोह्-रोसे  
ओ मजाटा हा ए कनारा ऐ

रौस नैन 'च रौस दुनिया पर  
नैन मिलता बी इक नजारा ऐ

मेरे भागें 'प ऐ रह् नगी कैस्सी  
हिरख कुप्पड़ ऐ रूप पारा ऐ

सोझ होऐ तां धोखो-धोखी के  
मिट्टा, मिट्टा ऐ, खारा, खारा ऐ

चैन सुरगै 'च बद् ऐदे शा  
भूठ यारो, ए भूठा लारा ऐ

दोखी झित्थे 'न चरचा मुक्की गई  
स्थान तुन्दा ए किन्ता भारा ऐ

मेरी गजलें दी तुं जिमी अड़िये  
मेरा हर शेअर तेरा शारा ऐ

✽



वनन दे मैहल आसैं दा मनां कोइ गजल आखी लै  
भरोसा के सुआसैं दा मनां कोइ गजल आखी लै

शलैपे दी सुराही 'चा' नशा जोवन दा लइ करियै  
भुला गम ए चुपासे दा मनां कोइ गजल आखी लै

नशीली रात, मैखाना, मिलन हिरखैं शलैपे दा  
अजब रंग ऐ गलासैं दा मनां कोइ गजल आखी लै

ए दब्बड़ दुनियादारी दा नि ऐ साक्री' दा बेड़ा ऐ  
के कम इत्थैं भड़ासैं दा मनां कोइ गजल आखी लै

बड़ा जोवन अजैं बाकी दिलै दे दाग धोने तै  
चलै दा दौर हासैं दा मनां कोइ गजल आखी लै

दिनै दी लाली रातीं 'च छपी दी ठिड्डे हिठ मनजल  
नि डर अनमुक नरासैं शा मनां कोइ गजल आखी लै

अजैं किशती बी सम्बली दी अजैं लैहरें'च नइं हलचुल  
बसाह के फी बी गासैं दा मनां कोइ गजल आखी लै

नमे जुग दे सवागत लइ नमी तांगें दा लै स्थारा  
बदल राँ पिछली घासैं दा मनां कोइ गजल आखी लै

✽

मेरे कन्नै रोह्-रोसा ऐमें तगानै  
दिलें पर ए परदा तां ऐमें तगानै

ही मुंह-जोर तां ए सबूरी गै मैह्-फल  
छड़ा मी गै फतवा तां ऐमें तगानै

हर इक शै रंगीली दिल अनजान चंचल  
किसै दी बी तोबा तां ऐमें तगानै

गलै कन्नै लाइ लइ जदू दुनियादारी  
फी कोडर इदे शा तां ऐमें तगानै

ए मन मामलं 'च न मन भांदे मेले  
कुसै पर बी दावा तां ऐमें तगानै

नि अपने 'च साह्-सत दुएं पर गै ईखी  
ए उमरी दा धोफा तां ऐमें तगानै

स्वारथ दे न्हेरै फसी सारी दुनिया  
कुसै इक दी चरचा तां ऐमें तगानै

जिदी नज़रें रड़कै मेरी हर नमी गें  
उदे शा किश आशा तां ऐमें तगानै

✽

कदैं चलदे-चलदे रुकदे, चली पाँदे रुकदे-रुकदे  
उदी इक नजर दे लोभी मेरे सुआस मुकदे-मुकदे

जिड़े छाए ओ अंत बरडन, इस ईखियै 'च रुज्झी  
मेरे हिरखै दे ए डोड़ खिड़ी पाँदे सुकदे-सुकदे

उदी उमर खटदे-खटदे मेरी अपनी उमर लंघी  
कदैं पोढ़ भनदे-भनदे कदैं ओठ टुकदे-टुकदे

इक गास दुइ पतालें बधै इस शा अगगें कुददर  
नजर उसदी उठदे-उठदे, नजर अपनी भुकदे-भुकदे

जदू चमक ही दुराडी तदू ईखी बी ही लो बी  
उदे भेत खुलदे जा दे मेरे कोल दुकदे-दुकदे

मिगी डर निं दुनिया कोला दनां जिन्दू दा खतोला  
ए निं हारी जा गमें शा खुशिये दे उकदे-उकदे

सदा मानुऐ गी दित्ता उस जिन्दगी नै धोखा  
ए समें गी भनदा आदा जिदा भार चुकदे-चुकदे





जिनें पीड़-स्थारी व जिगरे नि ढाए  
ओ रे छाती तानी सदा मुसकुराए

जिनें कून छोड़ी वड़े छिन्ने पाए  
करी सोहगा मी आपू दोखी खुआए

वघै दे न ए स्थान उन्दे दिनो दिन  
मिगी गै मकाने दे मौके नि आए

कदू तक ए छत रहौग थुमड़ें'प बनकी  
कदू तक चलग कोइ कुसै दे चलाए

असें दिक्खिये बी निहा किश गलाया  
उनें सुन सुनाई 'प सौ जुलम ढाए

कदे बी नि भुल्लग ए दिल स्थान उन्दे  
जिनें सोहल रस्तें 'च कंडे बछाए

उनें गरज के ही जे इद्दरें बी लंघदे  
मिगी रे खतोले, ए आए, ओ आए

इवी चरज हा मेरे मरने प आखर  
उदी अक्खियें बी दो अत्थरुं बगाए



ओ जेड़े भुव्वली विच खट्टे दे डारें दे वाकफ'न  
पछानु पतझड़ें दे न इने बहारें दे वाकफ'न

समें दे हर बदलदे रंगै दी सारें दे वाकफ'न  
निरे हासैं दे गै नईं साथिया लारें दे वाकफ'न

चवक्खें भीड़ नईं दिक्खो पछानो अक्ख दिल समझो  
ए चेले कारकें पर गिज्जे दे वारें दे वाकफ'न

लुटाइयै घर घराट अपना चलो इन्ना ते खोआ ना  
बड़े द्रान्ने न भाइ ए दुशमनें यारें दे वाकफ'न

थलै विच चमकदी रेतू 'प राह, राहूँ, गै पलखोंदे  
जेड़े जम्मे पले उत्थै उनें शारें दे वाकफ'न

बनी गे बेशना आपू 'चे गे मानु, नितां अजकल  
समुच्चै अम्बरै, धरती दे, चन, तारें दे वाकफ'न



प्यार थोआ नि प्यार कीता ऐ  
रोग मुगता सुआर कीता ऐ

थोपी थोपी ऐ खून जिगरै दा  
पतझड़ै गी बी ब्हार कीता ऐ

किन्नी खूब ऐ अदा ए रूपै दी  
भोले बनियै गै वार कीता ऐ

खैर मंगो सम्हालो अपने गी  
फी उन्हें अज शंगार कीता ऐ

प्यार बरदान ऐ किश लचारी नई  
कैस्सी भूठा करार कीता ऐ

मेरे मिटने दी धुम्म पड़ मुलखें  
कैसा सोहना बपार कीता ऐ  
लोड़ ए ही जे फट्टे दा सींदे  
हत्थें अपने लंगार कीता ऐ

जबर उन्दे छपैल नई, अम्बरा  
तेरे सत्तीं शुमार कीता ऐ

✱



कदूँ सम्बले जिनें खादी कुतै ठोकर करारी नइं  
गलाना दुए गी कैस्सी जदूँ आपूँ गै स्हारी नइं

जिनें कीती परख साढ़ी ते फी आपूँ तरोड़ी लइ  
उनें यारें दे दिल खुट्टे हे खुट्टी साढ़ी यारी नइं

ओ के जानन दिलें दा तड़फना जां बेदना उन्दी  
जिनें दुनिया 'च दिल लाया ब'कोइ पीड़ स्हारी नइं

तल्हैटे ते उबी होडन कदैं अपनी जुआनी 'च  
जेड़े हुन देऐ दे सिक्खां तदूँ आपूँ गै स्हारी नइं

पजोंदा पार कियां ऐ चढ़ी छल्लें दे मूँडें पर  
निं समझन ओ जिनें आपूँ कदैं मारी दी तारी नइं

जलन, लालच, ए खुदगरजी धुआड़ी दौलत ऐ, साम्बो  
मैं उस साथी गी के करना जो समझै औखी भारी नइं

भली गल्ल ऐ परूणै गी देऐ करदा ऐ छज मीणा  
कदैं अपनी गै खट्टै हिठ जिनै फेरी दी ब्हारी नइं

✱

मिगी दिललगी नै दस्सेया, बड़ा गै अजब नजारा  
उसी चुभदा मेरा हासा, मिगी उसदा रोह, बी प्यारा

कदै दिन्दा ऐ मी जीवन, उदे औठें दा ए हासा  
कदै करदा ऐ मी पागल उदी अक्खियें दा शारा

ना वचे गै उस ना भोए, इनें दौं पुड़ें मझाटै  
ए ममें दी दाब भारी, उदा जबर ओ करारा

इक रात बी ही काली, दुए लट उनै खलारी  
दनां देऐ दा हा उददम, मिगी लोई आला तारा

उदै पैहलें बी ते गुजरी, उदै बाद की नि गुजरग  
जिनै बन्नी लैता ए दिल, करी लैता उस गुजारा

मेरा रस्ता ऐ तां निसदिन, तेरी गैहली'चें मैं लघनां  
तेरे रूपै कित्ता पागल, ए नि सोचयां दुबारा

मैं हा बलगी-बलगी हुट्टा, तु हा पीदे पीदे दुट्टा  
तु ते ठूठे आया कारा, मैं हा मैहफलै गी भारा

मिगी किश पता नि यारो, मेरी बेड़ी कियां डुब्बी  
ना तुफान हा ना बिथ ही, ना गै भार जां लुआरा

✽

अजें कै पैर थिड़कै दे अजें कै चाल पई दिल्ली  
इन रस्ते दा रौ दसदा बड़ी दूर ऐ अजें दिल्ली

करी निशचा जो ठिल्ली पे ओ बेड़े पार पुज्जी गे  
जो बैठे होसला हारी समें नै छोड़े ओ यिल्ली

खुशी अपनाने तै औखें 'च बी मुसकानै पौंदा ऐ  
खुशी रोना नि दइ सकदा करै कोई गोद की गिल्ली

उदा साढ़े नै टकराना गै इस गल्लै दा साखी ऐ  
उसी साढ़े गै किश दोखी न अजकल देऐ दे सिल्ली

अटल विशवास मानु गी अटल रहौने दा थौ दसदा  
परौना ओ घड़ी पल दा गै जिस कोठे दी नीहं हिल्ली

इतें वैहमें 'च पलखोई कदूं कोई पार पुजदा ऐ  
कुतै निच्छें दे चरचे न कुतै लंघी गई बिल्ली

भलोके देवते हसदे न साढ़े मूड़ निशचें पर  
जो इस हट्टै प आई पुज्जे चुआनी नै चढ़ै छिल्ली

अड़ी जा जिन्दगी जेकर तरेली आवै मौती गी  
बड़ी टिल लांदियां भौड़ां ब नई दिन्दी रुड़त किल्ली





कदें ओ चेते दी गैहलिया बिच आइयै मिक्की कुआलदे 'न  
 कदें ते बलदी 'प तेल पांदे कदें फी आपु' गै स्हालदे 'न  
 हज़ार जतनें नैं ज़खम सीननें समे दे फाहे टकोर करदे  
 ब' पीड़ जिसलै बी हुन्दी मट्टी तां चेते दूनी ठुआलदे 'न  
 अजीब रोग ऐ दिलै दा लाना दना 'क गल्लै दी मुगती चरचा  
 निं बिन्द कून्दा ऐ मस्त रोगी ब' लोक थागियै जालदे 'न  
 उदे ए हासे दलासे खुट्टे जां खीसा दिक्खो जां मिक्की पुच्छो  
 जेड़े पलैंदे हे सद्दी - सद्दी अज उयै गल्लें 'च टालदे 'न  
 दुराडे पैडे 'च जिन्दगी दै जे थोड़ पाँदी तां रहबरें दी  
 निं होंदा घाटा ऐ ओके यारें दा जेके बत्त 'च गालदे 'न  
 नुआड़े अगै जे सिर नुआना ए काफरी तां फी सुन ओ शैखा  
 तेरी मसीतै दे कोट कंधां बी कुफर गोदै 'च पालदे 'न  
 खड़ोन बेड़ी दा कंठे उप्पर ऐ जियां रस्ते 'च कोई बसोनी  
 नितां ओ बनदी गै छल्लें गित्तै ते छल्ल उसगी सम्हालदे 'न  
 पता निं लोकें गी कैस्सी डंगदा ए साढ़ा मस्ती 'च बैहकी जाना  
 गुबार कडुने आं अस दिलै दा ओ सप्प छाती 'च ब्हालदे 'न



रात होंदी ऐ सुखने सुहाने गितै  
लो फी होंदी ऐ उद्दम जगाने गितै

डोडी सुरकै दी ऐ मुसकुराने गितै  
फुल्ल खिड़दे न मुरभाई जाने गितै

गम झंझोड़न हर इक जीवनै गी सदा  
भुनक होंदी ऐ गैं सोहू गी पाने गितै

रंग दो गै न असली दिनै राती दे  
बाकी दे सब इनें गी सजाने गितै

जलन आइयै पतंगे उदा दोश के  
जोत जलदी ऐ न्हरे गी ढाने गितै

स्थान मानु बनाइयै जो कित्ता उनै  
अमर किश निं ओ करजा चुकाने गितै

✽

मैं ऐमें गै तिरे चेते दी अग्गी 'च फकोऐ ना  
तगानै गै नरोऐ थार दुद्द अक्कै दा चोऐ ना

तूं अन-दाता बी नई मालक बी नई, नां गै फरिशता ए  
ए सब किश जानदे बी पूजनां ऐमें बतोऐ नां  
के होग अंत एके बज्जै दा मिगी कोई थौ पता दस्सो  
ओ हसदे न मेरे उप्पर मैं हासं पर लटोऐ नां

वफां के ऐ जफा के ऐ मैं भुल्ली भेत ए साथी  
दिलै दे अत्थरुएं नै दिलै दे दाग धोऐ नां  
तुआं हिरखै 'च रगड़ा ऐ ते तांह जीने दा लफड़ा ऐ  
दुपासै भार चक्की दा ते मैं चुपचाप भोऐ ना

चमतकार ऐ ए हिरखै दा जां फेर ऐ मेरी समझी दा  
खुदा हर बुत्तै गी समझी छदै अग्गीं में नोऐ नां

ऐ मेरी अक्ख ही जिसनै तुगी दुनिया 'च जस दित्ता  
तुं कैस्सी अपने पर जां रूप पर इन्ना पसोऐ नां





नईं तुसाड़े नै साड़ी निभी साथियो  
तां ए साड़े 'च गै ही कमी साथियो

स्थान पर स्थान होंदे रे तुन्दे थमां  
हिमत अपने 'च गै किश निही साथियो

औं जियै करना जां मौत गै रुस्सी दी  
इक झमेला वनी जिन्दगी साथियो

ढंग ते ज्हार हे दिन टपाई गिते  
पर तबीयत कुतै नईं टिगी साथियो

अस अवारा हे रस्ते बी भमियै मिले  
नईं तां टकराने दी खो निही साथियो

दरद वेदन गै भाषा मनुक्खता दी ऐ  
हिरख इस दी ऐ सुन्दर लिपि साथियो

गाह्क लबदा ऐ हिरखे दा विरला कोई  
ए जुआनी ते थां - थां बिकी साथियो

जबर तुन्दे नि झल्लग जदू बी कोई  
तुस करी लैयो चेतै मिगी साथियो



छुड़ो नींदरै गी समें गी सन्हालो  
तुस आपूँ बी जागो दुएँ गी बिजालो

अज ए धरत अम्बर 'न आले देऐ दे  
जरुरत ऐ कोई राम, गोतम, ठुआलो

समें दी जेड़ी गैं पटोइ जा नि मुड़दी  
ए खिन-खिन नमुल्ला नि गप्पें 'च गालो

निं लोऐ गी तरसन ए कुटिया दे न्हरे  
इदे ते बशक्क दाग जिगरै दे वालो

ए संजा दे गूड़े गड़ाके ते समझो  
नि छाई जा वरानी समें गी सन्हालो

मिलन बाग कंडे बी फुल्लें दै कन्नै  
जे गैं रक्खी ऐ तां इनैं गी बी तालो

बस ए चाह, ऐ मेरी जे हर मानुएँ नै  
मिलो मानुएँ साइं ते हस्सी कुआलो

✱

हुन ओठें अक्खिय शा अगड़े किश गल्ल बधानै पौनी ऐं  
किश होर नि समझै ऐ दुनियां ए गल्ल मकानै पौनी ऐं

हिरखै बिच आए भुंचाले शा बचने दी इक्कै सूरत ऐ  
किश उन्दी मन्ननै पौनी किश अपनी बी मनानै पौनी ऐं

जे उन्दियें गल्लें पर जाचै तां गल्ल गै मुक्की जन्दी ऐ  
जिस गल्लै पर छेड़ी ही गल्ल ओ गल्ल नभानै पौनी ऐं

जिस पलची दी जुलफे दे न्हरे छाई गे मेरे नसीबे पर  
हुन पलची - पलची उस नै गै तकदीर जगानै पौनी ऐं

हस्सने दी घड़ी बगानी ही तुस कोल हे बिंद 'क हस्सी ले  
रोने दी उमर ते अपनी गै इक्कले गै लंघानै पौनी ऐं

अज छड़ी दलीलें दै सहारै पैंडा ते पूरा होना नईं  
ए जीवन इक हकीकत ऐ, ओड़क अपनानै पौनी ऐं

बिना समाजै दुनियां बिच जी लैग मनुक्खता मुमकन नईं  
कोई रीत मटानै पौनी ऐं, कोई रीत चलानै पौनी ऐं





जैहूँ रै गी हस्सी - हस्सियै पियै ने चरज गै  
दुनिया दी खेचलें 'च बी जियै ने चरज गै

अज अस अधीन उन्दै तां इदे 'च हरज के  
मानु गी मानुऐं नै अकसर होंदी गरज गै

कितो न जह्वाँर जतन फी बी भुल्ली नईं सके  
सई होंदी किश न किश चुकाना उन्दा करज गै

तुर मनजला जेड़ा नि अपना साथ दइ सकै  
रस्ते 'च असनै गल्ल बी बेले दा हरज गै

करने शा पैहूँ लै सोचै जे तां किश नि बिगड़दा  
पैहूँ करी फी सोचना मानु गी मरज गै

अपनै दी गल्ल हल्लै तां ओ नैन पूंजदे  
सुनने आं उस फरिस्ता नां साढ़ा बी दरज गै

जीने तै जिन्दगी ऐ फी एदे शा नाठ की  
जिन्दा - दिली गै धरम साढ़ा, जीन फरज गै

\*

जखम सजरे हे आह्, बी निही फी बी इक  
रसमै गी पालना हा सै पाली उड़ी  
अपने हत्थें दइ लांवा अरमानें गी  
लोकाचारी गितै लोढ़ी बाली उड़ी

दोश अपना ना भागें ना लोकें दा हा  
हिरख साढ़े तै इक खिड़दी कंडियासी हा  
सोसनी पीले फुल्लें दिया ईखिया  
उमर कंडें दे चुब्बें 'च गाली उड़ी

सामनै मेरै मनजल बी नचदी रइ  
फी बी लो दूरै दूरै दी ठगदी रई  
गैं जदू बी कुतै नेड़ै - नेड़ै पइ  
भित्त ब्हेड़े कुसै बत्ती स्हाली उड़ी

हार दौनें गी हिरखै 'च सामी गै ही  
ओ जरी नि सके चुप असैं साधी लई  
थां कथां भंडदे रे ओ ब' इक अस हे बस  
मोमै दी बत्ती साई जिन्द घाली उड़ी

गल्ल बनने दी ईखी 'च गल्ल छिड़दी ऐ  
गल्ल सुनियै नि मनदे तां कोई गल्ल ही  
गल्ल सौ गल्ल करियै बी खोइ नई  
गल्लें गल्लें 'च गै गल्ल गाली उड़ी

मैहफलै गी वशक्क हुन सजाओ साथियो  
मेरे जाने प' खुशियां मनाओ साथियो  
उन्दे मुहैं दी रौनक ए दस्सै दी ऐ  
अशकें औं कोई बला ही जो टाली उड़ी



राज धरती 'प होइ चन्नै तक पौंच बी  
दुख इयै आदमी 'चा मोआ आदमी





जिदे औने दी लगी दी ही उआई  
 उनै औंदे गै सारै हिलचुल मचाई  
 निहा बलगना घट जिदा मी प्रलै 'शा  
 कियामत नजर मिलदे गे उसनै ढाई  
 उदी मीडियां खुलने दी ढिल्ल ही जे  
 हर इक बल गया जहार सुखने सजाई  
 जिसी फतवा कुफरै दा दित्ता हा लोकें  
 उस हिरखै नै मी बत्त सिद्धी सुझाई  
 इनै बद ओठें दा के भेत दस्सां  
 जो चुप रे ब गे सब फसाने सनाई  
 दिलै नै बड़े हस्सियै साम्बेया जो  
 उयै दरद रोगै दी बनया दवाई  
 पया किश नि पल्लै फिरी पनतें पिच्छै  
 उदा औना हा जाच जीने दी आई  
 तुसें रोज लइ जिन्दा नां मी डराया  
 उनें छल्लें गै बेड़ी कंढै पजाई  
 खलारे जो लोकें मेरी बत्तै उप्पर  
 उनें कंड दी चुब मिगी रास आई



जेड़े फुल्लें गी हत्थ पादे गै रौं कंडें दा बुज्जी गे  
 उनें गी मनजलै तक पुज्जने दे रस्ते सुज्जी गे  
 कदै चुब्बां, कदै कडे, कदै ए पैर सुज्जी गे  
 ब' जेड़े दुरदे रे दुरदे रे ओड़क पार पुज्जी गे  
 बलगदी राहू गी मनजल चलो तां साम्बदे रस्ते  
 सखाली औख उन्दे तै जेड़े औखें नै रुज्जी गे  
 किश ईखी ऐ गै ही पतझड़ दे पिच्छूं बहार ओने दी  
 वजोगी हिरखै दे ऐमे नि इस अग्गी 'च भुज्जी गे  
 ए दिल बी देन दाता दी हिरख बी उस नै गै दित्ता  
 नसीबा अपना अपना ऐं जां सुक्की गे जां उज्जी गे  
 दिलै दा हाल पुच्छो हां कोइ ओके नरोइयें शा  
 बिड़ी गे भित्त मैखाने दे जद ओ कोल पुज्जी गे  
 चलै तां जिन्दगी बइ जा तां मुरदा जन खुआंदी ऐ  
 किसी ओ डरन दुखें शा जो ऐकी सार बुज्जी गे  
 जेड़े छल्लें शा नई जरके वनी गे छल्ल गै स्हारा  
 दलीलां कंडै जो करदे कदू फी पार पुज्जी गे



लटोए, दिलै गी अवारा बी कित्ता

जुलम जानी बुज्जी गवारा बी कित्ता

ए तन उसदे पिच्छै नकारा बी कित्ता

कदै नईं उनै मिठ्ठा लारा बी दित्ता

कचैहरी उदी गे न्यां अस कराने

ब' चपरासियै बी बुलारा निं दित्ता

कदै जिन्दगी दी तरिशना निं चुक्की

लऊ कालजे दा मै सारा बी दित्ता

उदी जुलफ पैह्लें शा बी होर पलची

सम्हाली ही सौ लख साहूरा बी कित्ता

असं जिसदे पिच्छे छुड़े काफले बी

उनै दो गईं साथ साढ़ा निं दित्ता

हरइक थार इशकै गी भंडै दी दुनिया

शलैपे वखी बिंद शारा निं कित्ता

जमाने शा डरदे ओ मुंह मोड़ी ऐठे

जमाने नै टक्कर हा साढ़ा बी पित्ता

मिले हे बशक्क सुखना परमान गै सइ

भनाने तै सोह साथ ब्हारें बी दित्ता

जिनें साहें गी गिनदे रे उमर भर अस

उनें टुरदे लै बिंद सहारा निं कित्ता

✽



कुतां लोप सुख ते करार होइ गया ऐ  
ए जीना गै साढ़े प' भार होइ गया ऐ

सलामां न पग्गें मलाहजे मुएँ दे  
जमाने दा अज ए विह्,ार होइ गया ऐ

वड़े हीले जतनें नै शंगरांद पुज्जुी  
व' पैहलैं गै दूना दुह्,ार होइ गया ऐ

वशक्क सौ दलासे देयो तुस दिलें गी  
व' औना परौह्,ने दा भार होइ गया ऐ

ए मस्ती शरावै दी किस कम साढ़े  
लऊ पी-पी अपना खुमार होइ गया ऐ

सुखै दे फनूकें दी ईखी असें गी  
दुखै नै गै अनसम्ब प्यार होइ गया ऐ

अज अपना गै दिल साथ छोड़ै दा अपना  
जरो इब्बी मतलब दा यार होइ गया ऐ

✱

जमाने नै सुर जे मलागे तां जीगे  
समें नै जे हर गें वधागे तां जीगे

टुरी गे जेड़े ओ ते अपनी नभाइ गे  
जगाह् अपनी आपू वनागे तां जीगे

करग जिस तरीके नै अपना बगाना  
उदे नै उयै नइ नभागे तां जीगे

कुसै फेरना किन्नै चिर चुक्की मूढ़ै  
हुन आपू गै ह्त्थ पैर लहागे तां जीगे

जमानें 'च अपना ए नां रक्खने तैं  
जे अपने ए झगड़े मटागे तां जीगे

नमा दौर नित गै नमी गल्ल लहा दा  
पराने फसाने भुलागे तां जीगे



किश ओ न जेड़े टुट्टियें तंदें गी जोड़दे  
किश ए न जानी-जानियै आपू तरोड़दे

बिगड़ी खिने-पलें 'च गै जन्दी ते ऐ बशक्क  
उसगी सुआरने तै जमाने फी लोड़दे

दुनिया गी जीभ लग्गी दी किन्ने नै लड़गयो  
गल्लै बगैर अज कुसगी लोक छोड़दे

मनजल शा दूर रहींदी नइं सोची धरी दी गें  
काह्ली दे पैर मेशां गै बत्तै 'च रोड़दे

जियां बदलदी ऐ समें दी ठंडी तत्ती ब्हा  
खिडै दे रिशते खूनै दे फी नाते जोड़दे

छिन्नै नै मेशां बददी ऐ हर इक दिलै 'च मैल  
अपने दिलै दे गुवर बी रग-रग मरोड़दे

मरने परैत सारे गै जद नाते छुड़कदे  
मूरख न जीदे-जी जेड़े रिशता तरोड़दे

\*



तुं वसदे मैखाने दी गल्ल छेड़ साथी

आं पीने पलाने दी गल्ल छेड़ साथी

तरोड़े न चन्नै नै बदलें दे घेरे

किश उतसाह जगाने दी गल्ल छेड़ साथी

कमाने तै पुन्न-पाप जीवन बत्हेरा

हिरख अज नभाने दी गल्ल छेड़ साथी

जेड़ा किश कल होना उसी दिक्खी लंगे

अजें अज लंघाने दी गल्ल छेड़ साथी

ए ब्हारें दा मोसम समां वी सुहाना

तुं मस्ती 'च आने दी गल्ल छेड़ साथी

लटोए शलैपें 'प दिन रात जेड़ा

उस इशकै नमाने दी गल्ल छेड़ साथी

मैं तोवा तरोड़ां मेरी तोवा - तोवा

मी तोवा कराने दी गल्ल छेड़ साथी

जिदी लो नै चमकन ए रंगीन रातां

ओ जोतां जगाने दी गल्ल छेड़ साथी

नमें साज लइयै नमां जुग ऐ आया

जो गुजरी, भुलाने दी गल्ल छेड़ साथी



हुन अपना गै कडुने तँ लाह्, पइ गया ऐ  
 ए मानु शतानै दै राह्, पइ गया ऐ  
 अजादी दे कन्नै गै बटवारे, छिन्ने  
 समां केडी बड्डी सजा दइ गया ऐ  
 सुना कुसगी अपनी सुनै कोदी कोइ  
 बड़ी अफरा तफरी ऐ गाह्, पइ गया ऐ  
 खजां बददी जा दी चक्खें दिनो-दिन  
 फुहारें गी कैसा तराह्, पइ गया ऐ  
 बभोऐ दी ऐ भार ए जिन्द अशकें  
 मनुक्खै गी जीने दा फाह्, पइ गया ऐ  
 हुन अपने नै नफरत बगानें नै यारी  
 जमाने गी कुन ए सलाह्, दइ गया ऐ  
 ए कमजोरियां साढ़ियां दिक्खी परखी  
 गै लिस्से शरीकें गी साह्, पइ गया ऐ  
 जिनें मानु ते नां मनुक्खता गै भाखी  
 भले लोकें नै साढ़ा बाह् पइ गया ऐ



नशीले ओठें 'चा जद बी रसीले बोल फुट्टी पे  
कुतै किश आस वज्झी गई कुतै किश दिल तरुट्टी गे

ए पागलपन हा मेरा जां असर फी तेरे लारें दा  
तेरी गैहली 'च बीती उमर बैतल पैर हुट्टी गे

कलि दा झविकयै हस्सना गै भौरे दा नसीवा हा  
जतां जिस पासै गैं पुट्टी उदे परछामे जुट्टी गे

लटोआ राती दे न्हरे 'च जे कोइ तां के होआ  
गजब ए हा असैं गी ओ दिनै सत्तीं गै लुट्टी गे

दुखी की बाग सुकने पर ऐ बुलबुल बहार फी औनी  
वसोस उन्दा जो खिड़ने दे बिना डाली शा टुट्टी गे

मैं जद बी परखने गित्त कली परवाने दी छेड़ी  
बचैरा मरदा बिन मौती ओ हस्सी सूंक सुट्टी गे

कदै साकी नै बरताने 'च कोइ दिक्ख नइं किती  
नसीवा अपना - अपना हा भरे दे जाम टुट्टी गे

शलैपा उन्दा दिक्खने दी असैं गी कसक गै रइ गइ  
वनी गे जुलफें दे परदे कदै जे भुंड पुट्टी गे





मैह् कदा, मुसकरांदा गुलाब आइ गया  
 चैह् कदा, डैह् कदा ए शबाब आइ गया  
 दूर कर तुं दिला सब फिकर उलझनां  
 सामनै शरवतें दा नवाब आइ गया  
 खिल्लरी हर जगाह्, ब्हारें दी ताजगी  
 मस्ती दा बे-हिसाबा सलाब आइ गया  
 छोड़ परदा ते हुन बंडी दे साकिया  
 हर अड़ी दा तेरी लै जवाब आइ गया  
 पीना जेकर गुनाह्, ऐ तां सिर मत्थे पर  
 जीने दा किश मिगी थौ जनाब आइ गया  
 जोवनै गी कोइ केड़ी कुक्खें छपा  
 इशक अजकल बड़ा, बेहिसाब आइ गया ऐ  
 साम्बियै पैर धरना गै ठीक ऐ जरो  
 अज जमाना बड़ा गै खराब आइ गया  
 खोलियै भुंड तुं आ बी हुन सामनै  
 बलगदे-बलगदे इनकलाब आइ गया



उदी इन्तजारी 'च हर रात मुक्की  
सवी संजा ईखी फी लो लगदे चुक्की

तरेलू दे रूपै 'च रोइ रात सारी  
व फी बी ए अक्खी दी सेजल नि सुक्की

जियै करने मरने दी ईखी 'च इयां  
दुरै कोई जियां लाश अपनी गै चुक्की

नि घबरा मनां रस्तें दे गुञ्जलें शा  
इने हालें मनजल कदू कोल दुक्की

नफा तुप्प नइं मौती नै जुआ खेडी  
उनै सब बरोवर के यक्का के दुक्की

शलैपे दे छब्बै शा वचना ऐ मुशकल  
उदी शिस्त अज तक कदू कोई उक्की

उनै डंगेया जिसगी पानी नि थोआ  
व' फी बी नुआड़ी तरिशना नि चुक्की



अस इशकै 'च इय मजा समझी ऐठे  
उने शाप दित्ते दुआ समझी ऐठे

अजब गै नशा ऐ ए हिरखी नशा वो  
उदी बेवफाई, वफा समझी ऐठे

अस ओ भोले रोगी हे मौती दे ढा बी  
अदे औने गी गै दवा समझी ऐठे

हर इक डुबदा, तुपदा ऐ तीले दा सहारा  
व' अस डुब्बी जाना वचा समझी ऐठे

शतानै शा बी वह मिथदे दुए गी  
व' अपने गी सब देवता समझी ऐठे

मेरी बेगुनाह दा परमान इय  
उदी हर करैखी देया समझी ऐठे

गजब ए निहा बुत्तै गी पूजदे रे  
गजब ए हा उसगी खुदा समझी ऐठे





वशक बोल कोई नि ओठें पर आया  
मैं चुपचाप रइयै गै सब किश गलाया

दिलै दा गुवर अखियें नइ छपाया  
दिलै नै बी किश रक्खया नइ बकाया

अस अपने 'च रइयै बी किश बखले-बखले  
ए बीचक हा के साढ़ी समझा नि आया

ए मजबूरियां रमज न्होरे रोह्-रोसे  
मेरी गोदा हिरखै नै के किश नि पाया

हर इक रमज सइलइ दोऐ ओठ सी ले  
व' फी बी कुसै नै नि मैह्-रम बनाया

ना ब्हारें गी लाहमा ना माली गै दोशी  
ए खिड़ना गै फुल्लै गी नइ रास आया

वस ए मुक्के पैडे वस ए आई मनजल  
इस ईखी नै साढ़े शा के नइ कराया

असें साम्बी ले दुख जमाने दे फी बी  
उसी साढ़ा जीना दना नइ सखाया



तुगी तुपदे तुपदे नज़र फामी होई  
मेरी जिन्दगी मी तेरी थाह् नि थोई

कुतै अत्थरुएं बी नईं मोम कित्ता  
कुतै मिट्टे हासैं प' तुं गइ लटोई

नसीवे नै मिलदे न जुलफें दे छौरे  
अजैं दूर मनजल दनां लै वसोई

ना छुटकारा इयां ना ऊआं खलासी  
ए दुनिया कुसै डाल बी खुश नि होई

जो शक्की गे दुनिया नै उट्टन नि दित्ते  
जिनै अक्ख दस्सी उदै अगै नोई

मनां तु समी जा जमाने 'च जां फी  
जमाने गी अपने 'च तुं लै समोई

लिखे लोंकें दे तुप्पी तुप्पी फसाने  
ब' दो लफज़ी अपनी नि कहानी लखोई

✱

उन्दे शलेपे 'मेंरी सोचें 'प छाए जिन्ने  
दोखी बी ज्हारां जम्मे लक्खें गै पाए छिन्ने

दिखदे कलि नमानी करदे चक्खें गुन-गुन  
दिक्खो रसै नै भोरे लोभी बनाए किन्ने

भुक्खे ए वासना दे मीत होंदे नई कुसै दे  
कल दूर होने उन्ने अज कोल आए जिन्ने

रहोंदे ओ छिडै-छिडै फी बी बझोंदे अपने  
अस कोल-कोल होइयै फी बी पराए किन्ने

अक्खीं प रोसा जां फी दोशी दिलै गी मिथचै  
उन्ने गै अस लटोए ओ मुसकराए जिन्ने

उन्दी मसाल दइयै मुल्लां निं दे मी सिक्खां  
चरचे कुरान अन्दर इस शा सुआए किन्ने

ला दे ओ तोह् म्तां तुस आखी जिनै गी काफ़र  
उन्दे गै लारो-लारें मोमन बनाए किन्ने

लवदी उदे 'च मिक्की उन्नी गै लो नुरानी  
नां तूर दा लई तुस समझा दे ओ मी जिन्ने

✽



चक्खें शोर इस जिन्दू 'प अज इक साहू, बी भारी ऐ  
ब' फी बी जियै दा मानु जियां जीना लचारी ऐ

बगानें दा गै के चरचा बझोंदे गैर अज अपने  
दिलें दा कपट दस्सै दा ए सब स्वारथ खुमारी ऐ

तेरा नजरां बदलना कै मिगी अज भार सई होऐ  
तेरी अक्खीं दे भारै शा समें दी अक्ख भारी ऐ

भली दुबदा पया जीवन डरा दे ऐटम इक पेठा  
दूइ पेठा न सोह्ल आसां जे चन्नै तक डुआरी ऐ

जे अपने हत्थें सलगाई तां फी ए सोच डर कैसी  
फकोडन भूड़ कंडे जां कलि फुल्लें दी वारी ऐ

जुड़े दे ओठ, गिल्ले नैन, मूंह, इक रोगियै आंगू  
इयै बस रास रई अजकल इयै बस सगोसारी ऐ

समां नित बदलदा रह्योदा न साखी दौर गुजरे दे  
जियां गुजरी सकी दुनियां 'च मानु नै गुजारी ऐ

✱

अस हासैं गी हिरखी सन्हे समझी ऐठे  
हुन आपूँ गै रहाने आं के समझी ऐठे

ए बेमुल्ला देह नइं हा अस गै तगानै  
उदे पिच्छै हीरे गी खेह् समझी ऐठे

उनें साथ छुड़या इनें भंडेया मी  
ना ओ समझी ऐठे ना ए सझझी ऐठे

जे बनझाइ भंडदे तां अफसोस नइं हा  
कदूँ अस हे न्हे ओ जन्हे समझी ऐठे

ऐ वन्ना मेरी बेकरारी दा हा जे  
पछ्छके हे सजरे व' बेह् समझी ऐठे

समां हा नजर बिछदी ही नजरी गित्तै  
समां ऐं नजर मिलना ठेह् समझी ऐठे

शलैपे गी सब मिथदे मासूम भोला  
हिरख आशकें दी तरेह् समझी ठेऐ

ए अपने नै धोखा नितां होर के ऐ  
जिथैं ठैहरे अपना गै थेह् समझी ऐठे

✱

दुनिया दे सागरै दा कोई थौ सिरा नइं  
जीवन दी बेड़ियै गी भौड़ें पर गिला नइं

अंधी तफानें छल्लें पर के रोह् करै कोई  
कंठै खड़ोइयै बी जदू वचया सदा नइं

हर चीज रंग बदलदी ऐ अपने समें 'प आप  
नजरें दा तेरी साथिया कोई गिला नइं

गलती दा पुतला मानु गलती नित नमी करै  
फिर के गिला मेरे 'प में कोई देवता नइं

जां रोगी औं कवल्ला जां फी बदली तेरी नीत  
किश गल्ल गै हकीमै सत्ती बी शफा नइं

काफर बी किश ते मनदे ओ नि एकड़ा सई  
फिर ए ते नइं ना आखो जे उन्दा खुदा नइं

भुनकी सके नि जद तुगी मेरे ए अत्थरूं  
जां सूंक ए नइं जां फी ओ कालजा नइं

अज बी ते उयै मैहफलां अज बी ते उयै यार  
सच पुच्छो जिन्दगी 'च हुन ओका मजा नइं

✽



कुरस्तें मना पौग पल्लै नि कक्ख  
अवारा नि फिर गै दनां साम्बी रक्ख

ए दुनिया इथै धोए हत्थै गी हत्थ  
कुसै निग्गोसारै दा कुन लग पक्ख

वड़ी उमर रोढ़ी अवारा फिरी  
व टिकने 'च बी इक मजा ऐ सै चक्ख

जेड़ा कल ऐ सनमुख उदी फिकर कर  
जो बीती गया उसदी ईखी नि रक्ख

जिदी छाती दिल ऐ उसी दरद बी  
कदै होन्दी खुशवू नि फुल्लै शा बक्ख

ए जीवन नदी कंठे दुख सुख जिदे  
ना छुढ़दे ओ छिड़ा ना होन्दी ए बक्ख

कदै होन्दी नइं हिरखै बिच हार जित्त  
करै फेर घेर एके बेले दी अक्ख

दिलै बिच होए जे क जीने दी तांग  
फी रस्ते न ज्हारां जन्नन लबदे लक्ख

✽

तलोफे किन्ने गै रस्ते बत्हेरे थार आए लंघी  
कुतै बी पैर नइ थिड़कै कदै कोई गैं नइ संगी

हजारां सोच तांगां हुब निशचे ईखियां थोइय  
ब' मानु गी ते मेशां गै बरेसै दी रई तंगी

कुसी लाह हा जे खट्टन दूए दी लाचारी दा खटदा  
जिसी दा बिंद बी लग्गा उनै जाइ टीसिया टंगी

नसीबे गी सदा भंडदा जदूं बी माड़ी कोई हों  
तरीफ अपनी करै मानु कदै बी जे होऐ चर्ग

बशक्क मारै गड़ाके मानु गल घोटी मनुक्खता दा  
समें नै मारया मानु मनुक्खता होइ जद नंगी

ना रइ अपनी ना दूएं दी गै अपनाइ सके अज तव  
पता नइ केड़े गुप न्हेरें घसीटग सभिता दो रंग

ए इक्ल्लापन, दुआसी, चुप सब कोहूं दे रे मी मेशां  
उनै गी महफलै बिच बी कदै कोई याद नइ डंगी

यकीन होइजा जे चिरजीमे नै कम सारे मुकी जाडन  
तां छंदे मिनत तरलें कोई बरे दो होर लै मंग

✱

करग दिल तेरा जो सै देआं सजा  
ब' ढा पैहलैं जुलफैं दा परदा ते ढा

मेरे आलड़े पर कियां पोग बिज्ज  
दिखी लंगे हटदे गै काली घटा

कदूं मुनकर आं मै इस हिरखै थमां  
ब ए सुच्ची भगती ऐ नई कोइ गुनाह्

उआं उमर बीती हिरख सागरै 'च  
ना छल्लें दा थौ लगा ते ना गै थाह्

दुपासै नि सलगी इयै शुकुर हा  
जे उद्दर बी लगदी ता होंदे तबाह्

इनें आशकें दी परख गै सिदक  
दिलै नै ते पत्थर बी कित्ता खुदा

देऐ बांग मरने प' जीन्दे गी डांग  
ए दुनिया मजे नै ए नीती नभा

कुसै चाली बीती जा ए डंगदी रात  
दिला उसदे ओने दा धोखा गै खा

✱



हाम्ब्रे निं केड़ी पेठा कनारें गी तरसदे  
आपू बनें नजारा नजारें गी तरसदे

किश उन्दे न्हे न यारें दी जिनें गी नई कमी  
किश अपने न्हे जो रे सदा यारें गी तरसदे

इक ब्हार बचपने शा जुआनी 'च छोड़ी गई  
आया मिगी बढेपा फी ब्हारें गी तरसदे

भूठें गै कोइ सम्हालदा कुत्थै हे न्हे नसीब  
टुट्टे दे साज रइ गे मल्हारें गी तरसदे

पतझड़ दे भुस्से रौलें किश इयां बतेरेया  
अपना बी थौ रया नि फुहारें गी तरसदे

औंदा ऐ याद किश मेरे पछानु हे कदं  
फक्कै ने धूड़ ओकी नुहारें गी तरसदे

हिरखै दी पीङ्ग इस जमाने डर बझोंदा ए  
धोखा निं जिंद दइ जा लुआरें गी तरसदे

✽

बशक्क हिरखै 'च दिल टुटदे मते सारें दा थेह्, होंदा  
बिना हिरखै बी मुरदा जन ए दिल होंदा ए देह्, होंदा

मिगी हर रोज हर बेलै जिदा चेता सतांदा - ऐ  
कदै ओ बेला पल खिन गै मुड़ी औंदा तां केह्, होंदा

दिला कैं भूरना ओके जमानें गी जो बीती गे  
कदै जे दिल गै नइं लगदा ना ओ होंदा ना ए होंदा

कदै फुल्लें दी वरखा ए तां डारे बी कदै बरदे  
ए गल्ल हिरखै 'च नइं होंदी ना कोई मिटदा ना थेह्, होंदा

बड़े जतनें जुआनी साम्बै दी खेचल बछोड़े दी  
बढ़ेपे बिच ए बहार औंदी तां इस जिन्दू दा केह्, होंदा

मनां तेरी दुआसी नै गै अस गी हासे दिते न  
दुखी जे तुं गै नईं होंदा उनें ओठें दा केह्, होंदा

जलै दी उमर सारी धुखदी रहौंदी जोत नईं कूंदी  
व' ना परवाने दा अक्ख झमकदे जो जलियै खेह्, होंदा

जदू बी गास रोंदा ऐ तां धरती रौसली होंदी  
जे हिरखी नैन नइं बरदे तां इस धरती दा केह्, होंदा



भूठे रसमै खानें डकोंदी गै रइ  
जिन्द बेले दी चक्की 'च भोंदी गै रइ

ठकरें नि बशक्क कोइ बी छोड़ी कसर  
गैं नमें थारें पर नित पटोंदी गै रइ

चन्न बदलें 'च रइयै बी हसदा रया  
रात तारें 'च रइयै बी रोंदी गै रइ

डारें दी सेजें पर जोत जलदी गै रइ  
कदर फी बी पतंगे दो होंदी गै रइ


घुट्टें - घुट्टें कुसै पीता अपना लऊ  
सोह्ल जिन्दें प अक्क होनी चोंदी गै रइ

दिल नमे सिर नमे जखम खंदा रया  
अक्ख पिछले पछ्कें गी धोंदी गै रइ

अम्बरै गी लगा छून जद बी जुलम  
तद गै इनसाफै दी नीह् रखोंदी गै रइ

✽





गम निं दिक्खे जां सइ दिललगी गै नइ  
जीन्दी ऐ भाएं ब' ओ जिन्दगी गे नइ

जिसगी मानवता दी वाकफी ने नई  
आदमी होइयै बी आदमी गै नइं

सौरदा मानु वाह् दुश्मने नै पवै  
जिन्दगी तारदी दोस्ती गै नइं

हस नइं बुलबले ब्हारें गी दिक्खियै  
रहौनी बागै 'च मेशां खुशी गै नइं

रूप चोखा सई फी अधूरा मड़ो  
शोखियें नै जे बिंद सादगी गै नइं

कदर पानी सुखै दी बड़ी औखी ऐ  
जिन्दगी भर जो होआ दुखी गै नइं

हत्थ टाह् नो गी पाना तां पा सोचियै  
कंडे वी इत्थै गै बस कलि गै नइं

दोश के दीये दा इस घरै लइ असैं  
दिल बी जाले ब' होइ रोशनी गै नइं



गमै दा ए न्हेरा मैं ढां बी तां कियां  
ए रुस्सी दी ब्हार ऐ मनां बी तां कियां

मेरे पैरै पैरै प' कंडे न फुल्लो !  
तुसें गी मैं अपना बनां बी तां कियां

नि मुक्कने 'च आवै दे दुनिया दे किस्से  
ए क्हानी मैं अपनी सनां बी तां कियां

तरुम्बै दी ए अज ए चुप्पी मी अपनी  
दिलै दे शुआले दबां बी तां कियां

दिनो दिन होऐ दे जिदे रंग गूढ़े  
ओ मूरत दिलै 'चा मटां बी तां कियां

न जीभै गी डक्के ते जिन्दू गी चुब्बां  
मैं स्हारां बी कियां गलां बी तां कियां

जे दो चार होंदे तां दस्सी बी दिन्दा  
किश अनगिनत दुख न गनां बी तां कियां

✽

मिलदे गै इक नजर उदी पनछान होई गई  
इक लैहूर ही पल 'च जो तूफान होई गई

पैहलैं ते बलगी बलगी परेशान होइ गई  
आए तां रूप दिक्खी अक्ख रह्ना होई गई

जेड़ी खुशी तै ठगदे हे मी रोज पनत जी  
इस आत्मा गी मुफत ओ मुसकान थोई गई

रौसैं गितैं हुन मैं कुतै बी कैस्सी झांकना  
ब्हारें दी रानी अज मेरी मैह्मान होई गई

नइं धूफ, सिदक बट्टें गी करदा ऐ देवता  
दुनिया ए जानदे बी की अनजान होई गई

नेकी-वदी दा भेत दस्सी गइ जो रोशनी  
गीता, ग्रंथ, अंजील ते कुरान होई गई

✽



की अड्डा नां झोल नमानी  
कदर दिलै दी कुस नै पानी

हुसन घमंडी सब जग जानै  
इशक बचैरा गल्ल परानी

जो बीती सो सुखना जन ही  
की छेड़ै ना गल्ल परानी

कैस्सी खोलै नां ओठें गी  
कुसनै सुननी तेरी कहानी

गैं पुट्टो तां रस्ते लबदे  
बइ रहौना मौती दी नशानी

छंदे करना, हौले पौना  
होन कदं नइं बट्टे पानी

तोपा तोपा खून सकाना  
भैड़ी आदत कैं अपनानी

की गल पाने जालो खालै  
सोगी करनी जीवन कहामी

✽

उसदे करी सब किश जदू' नीलाम होई गया  
ओछें 'प दोखियें दै चरचा आम होइ गया

रहूँदी ही हर समैं ओ जेड़ी भीड़ कच्छ-कोल  
होंदे गै खीसा खाली एका राम होइ गया

दिक्खो हां अज समैं नै कैसा पासा परतया  
भारा उनें गी मेरा गै परनाम होई गया

हिरखै दे बी कनून किश अजीब होई गे  
करदा कोइ कुसै दै सिर इलजाम होइ गया

कैस्सी मी खुड़कदा ऐ उसदा इयां लंघना  
नजरां चुराइयै लंघना अज आम होइ गया

पीऐ दी अज लक्खां जैहूर ऊआं जिन्दगी  
मुफतै 'च इक नशा गै की बदनाम होइ गया

दुनिया बी सिर नुआंदी ऐ जोरावरै थमां  
भुकया जेड़ा सो उमरी तै गुलाम होइ गया

बड्डी इदे शा होर केड़ी होनी ऐ प्रलै  
जीना गै जिन्दगी पर अज रह्म होई गया

✱

मनुखता गै मन्नने आं परधान अस बी  
देए करने मानु गी अत्त मान अस बी

बुए देस गासै गी तुस चांहदे ओ जे  
नि देसै दा चाहचै की सनमान अस बी

हर इक चाल दिखै ने समझै ने तुंदी  
किश इन्ने ते नइ ऐं अनजान अस बी

बशक्क डौले थपकियै दुनियां गी दस्सो  
पता ऐ जमाने गी बलवान अस बी

दनां फंग लगदे गै तुस जिसगी भुल्ले  
चढे आलड़ै उस्सै परवान अस बी

मटाने ते जिस देसै गी हाम्बै दे तुस  
उदे हासैं लई होंगे कुरबान अस बी

बड़ी सोहल हिरखै दी तदे 'च बज्जे  
ब' औचै रमै 'च तां तूफान अस बी

कदे साह् सुखै दा नि दिंदी लड़ाइ  
ते इनसान तुस बी ओ इनसान अस बी

✱



मन्नया जे ऐ नि सौखा औखें 'प कावू पाना  
औखें शा बी डरी के मानु कियां खुआना

कल उन्दे पर हा कावू उब्बी ते हा जमाना  
अज अपना दिल नि कावू औना हा ए जमाना

पानी दा बुलबुला सइ दुनिया 'च फी बी मानु  
जीन्दा रवै तां कहानी मरदा तां इक फसाना

दुनिया बत्हेरी हस्सी परवाह् नि बिंद किती  
अज भार जन बझोआ उन्दा बी मुसकराना

रंग नित नमें बदलना कलियो थुआड़ी फितरत  
कल तक हे अस नशाना अज होर कोइ नशाना

औखें दी गोदा बइयै दुख दरद लोक वंडन  
औखां गै भेत खोलन कुन अपना कुन बगाना

हिम्मत नि हारै मानु परता समां बी खन्दा  
कल औंदे, कल गै जन्दे, कल्लै नै कल फी औना

कल्लै दा किश पता नइ मानु गी जिन्दगी भर  
फी बी बधा दा तांगां साहें, दा आना जाना

✱

कदूँ आए हे मरजी नै जे हुन आपूँ चली जाचै  
ब' जेकर आइ गै पुज्जे तां की नइं किश करी जाचै

ए जीना नां जुआनी दा जां तांगें दा शुआलें दा  
उबी कोइ जीन गिनती 'च जे बस जमचै मरी जाचै

हजारां ठोकरां लग्न बत्हेरी अंधियां झुल्लन  
बगैर उद्दम ना-मुमकन जे सफर पूरा करी जाचै

चुनी जा ने आं नित दुनिया दे बागै चा ए फुल जित्थें  
कदै कंडे गी हत्थ पइ जा तां फी कैस्सी डरी जाचै

खुशी ए आरजी एदे प' इन्ना मान के करना  
बरेसै दे जेड़े साथी ओ गम कैसी नि अपनाचै

ए दुख सुख पतझड़ां बहारां न इस उमरी दे बुटे लई  
ए धुप-छां बदलदी रहौनी किसी एमें गै कलमाचै

खुशी दुनियां बझोंदी ऐ ते दुख अपने गै सइ होंदे  
ब' जे सारें दा दुख बुझचै अमर की नइं अस होइ जाचै

✽

अपन दा बगानें दा नि कोई बी खियाल आया  
 आया जे कदै सनमुख अपना गै खियाल आया  
 मैहफल 'च मेरे चरचे यारें 'च हा नां मेरा  
 बीती प' ए दिल रोया रइ-रइयै बुआल आया  
 औंदा ए तेरा चेता बिंद ब्हेल गै जे लगै  
 हर वकत मिगी भूठ ऐ तेरा गै खियाल आया  
 अजकल ते गरीबें तै मरना बी बड़ा औखा  
 रसमां बी लऊ चूसन कप्फनै दा सुआल आया

पीना गै बस इक जीना कइयें दा गलाना ऐ  
 ओठें नै जदू लाई रिजकै दा खियाल आया  
 हुट्टे निं करी मेहनत हिम्मत बी करी दिक्खी  
 इस पासै जे बिंद निबड़ी उस पासै शुआल आया

दौं फुलकें दी अज चिन्ता साहें दे चलाने तै  
 रखचै के बगानें दा अपना निं खियाल आया  
 ए दौर मलावट दा हर चीज मिलै खुष्टी  
 भा' असलै दै अज बिकदी नकलै गी कमाल आया  
 ए दिन बी कदै फिरडन? चूप धरत की चुप अम्बर  
 ओठें प' मेरे रइ-रइ बस इयै सुआल आया





लब्बै दी तोड़ चढ़दी हिरखै दी साढ़ी कहानी  
किश हा जनून साढ़ा किश उन्दी मैह्रवानी

तुस कोल, चाननो बी, फी मखमली ए उंघां  
की मान किसमतै पर करदी निं ए जुआनी

छाती 'च दिल ए मेरा पैहलै बी धड़कदा हा  
हिरखै बगैर इस दी कीमत निही दुआनी

ब्हारें गी घोटियै मैं छाती नै की निं लां अज  
दित्ता ए साथ मेरा समझी जिने सलानी

किन्नी अजीब शै ऐ मानु दी अक्ख दिक्खो  
हस्सै तां बगदा पानी रोऐ तां बगदा पानी

छेड़ो समें दी कहानी जिसदी नजर सवल्ली  
दुनियां दी गल्ल छोड़ो ओ रहौनी गै बगानी

लाह्, जो समैं शा लैदा उसगी चतुर गलांदे  
खेडै दी ए बढेपे दी छामां ए जुआनी

हिरखै दा घुट्ट पियै मस्ती 'च नच्च साथी  
हेरी दुखें दी मुक्की चमकी ओ लो नुरानी

✽

ए दुनियां दे मेले 'च रइ गोद सक्खनी  
पता नइ कदू तक अजै धूड़ फक्कनी

धरो गै दिलै दा ए दरवाजा खुल्ला  
व दिल शीशा कच्चा दना सांम्ब रक्खनी

नि दसतूर टुटै तेरी मैह् फलै दा  
इदे 'च के हरज ऐ दना पौग चक्खनी

नजर इक कुतै मेरै पासै बी साकी  
कदै बखश मी बी घड़ी ओ सलक्खनी

नि बसरे 'प जाओ ए दिल जिगर परखो  
दिलै दी दुआसी कुसै कियां डक्कनी

सबर बी बेस्हावा मने बही बेदन  
अवारा दिलै पल्लै माल होर कक्ख नि'

तुसें पनत जी गुर ए कोदे शा लता  
मिगी चाननी आपुं गै न्हेरै रक्खनी

मेरी धड़कने उसदी गैह्ली 'च आइयै  
ए नजरां मलांदे किसी इन्नी झक्कनी

✱

चक्खें जिंदगी फी बी आं में लाचार के आखां  
 में आपूं अपनी बरबादी दा जिम्मेदार के आखां  
 हजारां गुबर लइ ए दिल तेरी महफल 'च औंदा ऐ  
 ब' इत्थें पुज्जियै चुप की खै हर बार के आखां  
 हर इक शै बदली बदली दी हर इक अक्ख घोखां घोखै दी  
 तेरी गैहली 'च इस चाली में खज्जलखार के आखां  
 हर इक चाह सैहकी - सैहकी दी ते ए दिल लीरां लीरां बी  
 दना पर फी नि बदले तुस मेरी सरकार के आखां  
 बियाइ रात मैखानै ते दिन रातीं दे चेतें बिच  
 किसी फी शैख तुप्पै दा मी थारो थार के आखां  
 बड़ा गै खोखला लबदा मसीती बिच बइयै बी  
 जलै दा मेरे पर जेड़ा मसीती बाहर के आखां  
 होऐ दे हर गईं नंगे मुह्मां मिट्टे दिला काले  
 व फी बी कुड़दे दो धारी नि ए तलवार के आखां  
 ए थौ होन्दा जे तुं सोलां तेरे चले सवा - सोलां  
 तां इस चाली में गै धरदा तेरै दरबार के आखां

\*



चोह्लवाजी दे अस गै नशाने होए  
नंगे हर थां प' साढ़े फसाने होए

रोह बगानें प करचै तां किस गल्लै पर  
दुख ते अपने दा जेड़े बगाने होए

अपनी करतूतें पर हस्सी पौ बिजलियो  
जिंदे नै तीला तीला ठकाने होए

बेरुखी ब्हारें दी साढ़े नै दिक्खियै  
साथ देने गी अगड़े बराने होए

मनजलै पर भरोसा करै के कोइ  
राह पछानु बी जिसलै अंजाने होए

मुंह छपैलै केड़ी कुक्खा भलमानसी  
चोर चक्के गै परधान दान्ने होए

याद उन्दी किसी नींदरा खुस्सै दी  
सकल दिक्खे दे जिन्दी जमाने होए

✱

दनां भर सामने औंखे तां के नुकसान होइ जन्दा  
किश अपनी गल्ल रह जन्दी किश उन्दा मान होइ जन्दा

ए मेला दौं खिनें दा ते बछोड़ा, जिन्दगी भर मै  
ए दो खिन मै खुशी थौंदी तां मै कुरबान होइ जन्दा

ए दिल बी के ऐ इन्ने दुख जरै दा फी बी नइ कूँदा  
ब' जे मुंह जोर बिम्बली जा तां इक तुफान होइ जन्दा

ए मन होंदा जे नइ चैचल जां ठगनी आस नइ होंदी  
कलि दा खिड़ना मै भौरें गिते वरदान होइ जन्दा

तुं दे सीसां नशेइयें गी पसो नइ अपने पर साकी  
जे बिड़की जंदे मैखाना तेरा वीरान होइ जन्दा

समां कइं खेडदा खेडां इनें हिरखै दे राहियें नै  
कुसै गी मान थोइ जन्दा कुतै सरतान होई जन्दा

हजारां मजबें दे ताम्में, अनेकां मान दुनियां दे  
मिगी ए तांग रई मेशां जे औं इनसान होई जन्दा

✱

ए विपता बितै शा वी भारी गै थोई

जमाने दी यारी वी यारी ऐ कोई

करै दे न चढ़दें गी सब गै सलामां

नभांदा निं ढलदे नै यारी ऐ कोई

दुए गी सब आखन दना सबर अड़या

ब' आपू कुनै गल्ल स्हारी ऐ कोई

हर इक दा गी हारै ने आं जानी बुझी

असां - जो वी डिरगा जुआरी ऐ कोई

नसीबे ते मेशां वने कोशशें नै

कदै गल्लें किसमत सुआरी ऐ कोई

असैं उन्दी हर गल्लै पर परदा पाया

उनें सौ छपैली ब जाह्री गै होई

ओ के मान रक्खै दुए दा जिदै 'श

ना छज अगें ना पिच्छै व्हारी ऐ कोई

मैं तुपदा फिरै दा हा जीने दा रस्ता

सब आखन बड़ा गै पुआरी ऐ कोई

✽



हुन अपनै हत्थ गै सरमत्थ कोइ संगी निं तादी नइ  
 किश ऐसी नित्तल होई दुनिया कदै बी अशकै साधी नइ  
 ओ दिक्खो चोर ! अज रस्तै खड़ोइयै चोर आखै दे  
 दना सिर चुक्कियै चलने दी साधैं गी अजादी नइ  
 गिला किश तेरे धोखें दा जे मैं कित्ता तां बस इयां  
 मेरे अत्थरूं मेरी गोदा ढंडोरा नइ मनादी नइ  
 कदै दो चार घुट पीते तां इस गल्ला जे तुं दित्ते  
 तेरे हत्थें ए जैहूर अमरत नित्तां अस कोई सुआदी नइ  
 मेरी नजरें 'च जीना ऐ दिले बिच तांगे दी धड़कन  
 बिना रीझें दै मानु भार धरती पर अवादी नइ  
 जिनें जम्मी नि किश कित्ता गुजारी उमर ते मोए  
 छड़ी कंधें दे कोठे हे कदै दिक्खो दी लादी नइ  
 उयै पुजदे न मनजल पर उयै दुनिया प छांदे न  
 जिड़े दसदे न किश करियै निरी गल्लें दे आदी नइ  
 बत्हेरे छल्ल टकराए मुड़ी गे आपूं टकराइय  
 रया मैं पहाड़ जन बनका दनां बी जरक खादी नइ

\*

किसी पुच्छै दे रहने होइ ए सुआल  
ए सब देन तुंदी "मेरा एक्का हाल"

ए पल्ले दी गल्ल ऐ निं यारें दी चाल  
वनी बहैन सब होऐ जद पल्लै माल

तुसैं गी धनै दा बड़ा मान सइ  
असैं दिल गै दौलत बड़ी बेमिसाल

बदलदी ऐ धुप-छां समें दी सदा  
बुड़ो साढ़ी रक्खो तुस अपनी सम्हाल

दुरहा करदा यारें दी खूदगरजियां  
मेरी गोदा आइ पौंदा जो चिट्टा बाल

बशक्क आए धौले, जूआनी 'च गै  
ब' समझी गे किश-किश जमाने दी चाल

ए गम में सुखी, तुस सुखै बिच दुखी  
फी आपू गै सोचो जे कुन ऐं कंडाल

बुड़ो अपनी सभिता नि लोकें करी  
कदें कां बी चलया हा हैसैं दी चाल

\*

मैं अजनबी अवारा बंतल मेरे तराने  
ब्हारां मी देन मस्ती हासे मेरे खजाने

दिन चार जीवनै दें कटुने की रोंदे-धोंदे  
आए दुरी बी जाना, रहौने न बस फसाने

औंदे न मस्तिर्यें 'च जद बी मुहाने मोसम  
ब्हारें दे गीत गाने दी सोचदे वराने

अज अक्ख साकियै दी गासै गी की निं छूऐ  
किछ रूपै दे पुजारी किश पीने दे दिवाने

जरको तां सब दबांदे चढ़दे गी सिर नुआंदे  
परखी दी सारी दुनियां बनझाए दे जमाने

हिरखै दो बत्तै उप्पर बढदे गै रे अस अगैं  
पट्टर जो दोखी बेठे लांदे गै रे नशाने

हसदे गै तुप्पे रस्ते जीने दे जीने आलें  
औंदे बी रे जमाने जन्दे बी रे जमाने

✱



मजबी जन्नू नै बिच नइ गलतान चाइ दा  
समझै जो मानवता गी ओ इनसान चाइ दा

राक्ष नि देवी देवता भगवान चाइ दा  
इनसान गै जद जम्मया इनसान चाइ दा

बुक्कली 'च तेज चाकू ते मुएँ 'प राम-राम  
साथी नि मीसना नया बइमान चाइ दा

मरना गै जद फी जिन्दगी की हाम्बदी उसी  
जीने गितै जीने दा गै अरमान चाइ दा

इयां ते किन्ने आए, किश बसोए, टुरदे होए  
उमरी तै चेतै जो रवै मैह्मान चाइ दा

जबरै 'प जिदी नीह होए बलकारी ओ नइ  
ताकत छड़ी नि हिरख बी बरदान चाइ दा

इस चाली गै जी सकदी ऐ दुनिया सुखें-सुखें  
हर मानुएँ दा मानु कदरदान चाइ दा

मजबे दी आइ लइयै जो कोई पशू बनै  
धरती पर ए नया नि कोई शैतान चाइ दा



जुआनी लंघाई वढ़ेपा मकाया  
 निं समझै 'च राँ इस जमाने दा आया  
 कुतै चलदे चलदे गै कम्म सौरदे गे  
 कुतै ते भरोसा बी नइं कम्म आया  
 मैं ए स्थान बेले दा अज की निं मन्नां  
 जिनै दस्सेया मिक्की अपना पराया  
 बशक्क नंगी होई ऐ यारें दी यारी  
 शुकर ठोकरें दा जे जीना ते आया  
 हुन ओ दरद गै जीने दा ढासना हा  
 दिनो दिन जो होंदा गया हा सुआया  
 सम्हलदी गइ उन्नी गै मेरी किशती  
 चवक्खें दा छल्लें हा जिन्ना दवाया  
 के बेवकत धोखा बरेसै नै दित्ता  
 मसां अरथ जीने दा समझा हा आया  
 बशक्क उसनै मानु बनाइ मान दित्ता  
 उदा मान बी मानुएं गै बधाया

✱

बागै दी चूका - चूका किश पतझड़ै दे छौरे  
फुल्लें नुह्रार बदली पागल फिरै दे भौरै

बुलबुल करै गिला तां कोदा फी कोदे कन्नै  
शोखी भुलाइ फुल्लें माली बी होए बौरै

तुस रंग-ढंग कैस्सी पुच्छै दै मी फलै दा  
अस ए बी भुल्ली गेदे जे अस कदै हे खौरै

कारी करो हां सौ तुस अंगें जो बइ न गेदे  
मुशकळ गै बाह्र औडन ओ स्वारथें दे नौरै

ठोकर जुआनी खा तां के चरज अन्नी होंदी  
अजकल गड़िदे खा दे लोभी ए बुड्डे चौरै

बागै 'च भंग पियै सुत्ते जो तान दइयै  
लोकें दा के उनें गी वेशक ओ खान मौरे

हिम्मत निं हार जिन्दे तोसी लै जिन्द लाई  
न्हैरें 'च गै डलकदे ओ भुसमुसे दे छौरै

✱



जींदी ऐ फिर वी बेजान ए जिन्दगी  
 किश बझोंदी परेशान ए जिन्दगी  
 नेमतां सारियां बेले नै खुस्सियां  
 चढ़नी ऐं कियां परवाना ए जिन्दगी  
 कैहर मालक दा जां अपनी करतूत ऐ  
 सोची - सोची ऐ होइ रहान ए जिन्दगी  
 भुस्से मुंह दिक्खियै सइ होआ दा इयां  
 किश दिनें दी गै मैहमान ए जिन्दगी  
 कोल दुक्की प्रलै दस्सै करदा समां  
 दिक्खै दी फिर वी अनजान ए जिन्दगी  
 अज उदे शा वी मुनकर जिनै दिती ए  
 होइ शतानै शा परधान ए जिन्दगी  
 हालत एकी वी ओड़क मुकी जानी ऐं  
 जीग कद तक ए इनसान ए जिन्दगी  
 जे क तुप्पग तां इस गुप्प न्हरे 'च गै  
 पाग हर ढगै दा मान ए जिन्दगी  
 जिन्दगी बिच नमें रंग भरने गितै  
 करने पौंदी ऐ कुरवान ए जिन्दगी

✱

नईं कुसै अपना बनाया नइं सई  
 हिरख नइं झोली 'च पाया नइं सई  
 फुल्ल जंगलै बिच बी होऐ फुल्ल गे  
 नइं कुसै नजरी 'च आया नइं सई  
 जिन्द ते साह् लै दी ऐ दुखें 'च बी  
 नइं खुशी दा मोसम आया नइं सई  
 गैं पटोइ ऐ तां मनजल थोग गै  
 नइं कुसै बी रस्तै पाया नइं सई  
 अस निभी जा 'नि समें दे कन्नै गै  
 निभन दुनिया नै नि आया नइं सई  
 सोध मनजल दी ऐ बिज्ज गै पाइ गइ  
 चन्न बदलें चा नि आया नइं सई  
 साथ दइ गई तोड़ उमरी दा जिमी  
 तरस गासै गी नि आया नइं सई  
 जिन्दगी दुख सुख दा गै परछामा ऐ  
 रात लम्मी दिन नि आया नइं सई  
 कुदरत नै नित भला चाह्या मेरा  
 रास दुनियां गी नि आया नइं सई



बड़े थोड़पिते न जिन्दू गी जेड़े  
 जमाने दे सच्चे 'च ढाली नि सकदे  
 दना दुख जे पुजदा तां जिगरा नि होंदा  
 खुशी बिंद थोंदी सम्हाली नि सकदे

किश ओ दोखी हे मेरी लाचारियें गी  
 जिनें जानी बुझियै नंगा नि कित्ता  
 किश ओ यार न कोला लाइ मसाले  
 मेरे चरचे करदे छपाली नि सकदे

बड़े नोखे ढंगै न साढ़े मजाटै  
 ए हिरखै दे ओंकर न फुट्टन लगे दे  
 ओ साढ़े फसाने सना दे असें गी  
 ब' अस चाहने पर बी कुआली नि सकदे

बड़ी साम्बियै अगग खट्टी असें ही  
 खलारी गे फी बी समे दे फनूके  
 किश इस चाली भड़के न लोरे दिलै चां  
 बगन जहार अत्थरूं ब स्हाली नि सकदे



निं यारें दी यारी शा अनजान हे अस  
जमाने दा रौं बी असें भाखा हा पर  
नई सुध गुआची जे दिक्खै ने बिट-बिट  
तवाइ गी अपनी बी टाली निं सकदे

उदी चाननी नइं ही साढ़ै नसीबै  
उदी अगग लाइ दी अजैं तक जलै दी  
कुसै ब्हानै सइ लो ते ऐ आलड़े बिच  
बशक्क दीये हिरखै दे वाली निं सकदे

हनै होश आई भला ठोकरें दा  
अजैं उमर पइ दी ए घर साम्बी लैगे  
सदा कसक रौह्नी ही अपने दिलै बिच  
जे अपना पराया बी ताली निं सकदे

जिदे पैर रस्ते दी औखें शा कम्बन  
उदै स्हारै तुप्पै जे कोई मनजलै गी  
तां अनहोनी गल्ल ऐ जो तिल्कै दे आपू  
कदै बी कुसै गी सम्हाली निं सकदे

✱

अस भाएं जितचै ते भाएं हरचै ए लोक की गल्लां करदे न  
अस भाएं जीचै ते भाएं मरचै ए लोक की गल्लां करदे न

अस दो आं घड़े घड़ियाली दे टकरा करने फिर बी इक-मिक  
सौ रोह-रोसे भाएं अस करचै ए लोक की गल्लां करदे न

इक - दूए दै साथें - साथें हिरखै दे वाग अस आइ पुज्जे  
हुन झोली भाएं कंडे भरचै ए लोक की गल्लां करदे न

लोकें दी चरचा करने दी खो पइ गइ दी ऐ लोकें गी  
किश समझ नि औंदी के करचै ए लोक की गल्लां करदे न

किश मैं आखां किश तुस आखो कोइ लाह्मा नइ के मीणा ऐं  
अस भाएं आपू 'चें किश करचै ए लोक की गल्लां करदे न

खुल्ले दे युगें 'शा मैखाने पी जा दे बत्हेरे मुजतें 'शा  
अस जद बी कुतै जाइ घुट भरचै ए लोक की गल्लां करदे न

लइ फगड़ी अस इक दुऐ दा भौड़ें नै खेडी जा करने  
भाएं रुड़चै ते अस भाएं तरचै ए लोक की गल्लां करदे न

✽

बड़ी उमर रोढ़ी ऐ भूठे दलासैं  
 बड़े चिर पलेखे 'च पाया ऐ आसैं  
 बनानै गै पौने न जीने दे साधन  
 नितां साथ मुशकल गै देना सुआसैं  
 मनुक्खता ते दुसकै दी अज सिर छपैली  
 छया धरम निंगली ऐ कुफरै दे हासैं  
 समें दी गै देन ऐं जे अज दिक्खो दिक्खी  
 जगाह्, घोरियें दी ऐ साम्बी नमासैं  
 नमां जुग नि औना कदै सुत्ते-सुत्ते  
 जगानै गै पौनी ऐ हुब चौन्नें पासैं  
 करी निशचा गैं गैं जदूं बददे जागे  
 तदूं साथ छुड़ना ऐ साढ़ा नरासैं  
 डकोदे कदूं मोसमें दी जंजीरें  
 ऐ पक्खरूं ते मेशां गै उडदे न गासैं  
 मेरा कम्म नित गै नमे रस्ते तुप्पना  
 ऐ दरया बशक्क बगन पिछली गै घासैं

✱



अजें ए मन भरोचा नइं अजें ए शौक नइं हुट्टा  
अजें रोकै ना की साथी अजें कोइ जाम नइं टुट्टा

मैं जिस मस्ती दा भुक्खां जे उदा सिर पैर थोइ जन्दा  
किसी फी जिनियै ब्हाँदा तेरी मह्फल दी इस गुट्टा

समें नै मेलया जियां असें गी एकी हट्टी पर  
नयां बी करग साढ़ा जे खरा कुन ऐ ते कुन खुट्टा

अस उन्दे 'चा नइं जेके तेरे हासैं प' मरदे न  
असैं हिरखै 'च कडियारी बी जोखी, जोखिया गुट्टा

बड़ी माड़ी घड़ी हिरखै दी गैह्ली गैं पइ साढ़ी  
शलैपें अक्ख बदली लइ नसीबा इशकै दा फुट्टा

टकोदा भार जीवन दा, इसी चुक्कनै गै पौंदा ऐ  
सम्हालै कोइ बशक्क सिद्धा धरै मूंडै बशक्क पुट्टा

बशक्क सुनसान बत्त अपनी बशक्क मनजल बी ओह्ले गै  
कदें जरकी निं गैं अपनी कदें होआ निं दिल ब्रुट्टा

\*

अपने चक्कखें ब्हारें दा घेरा बी हा कदै  
खुल्लै समान अपना फेरा बी हा कदै

पुज्जै दी नई मेरे 'श जेड़े बागै दी मुहाट  
उस बाग मेरा अपना डेरा बी हा कदै

अज औ बिना फंगें चक्कखें पिजरा निगार  
कुन सोचया नसीबे 'च न्हेरा बी हा कदै

हर भेत मेरा, जिस दा तीला तीला जानदा  
उस आलड़े 'च मेरा बसेरा बी हा कदै

मजबूरी ऐ तां बेजती दी चूरी खा 'र नां  
जादी दे दाने पर गुजर मेरा बी हा कदै

खंडर ए दिक्खियै की धोखा खा दे साथियो  
बेशक्क ऐ अज ए रात सबेरा बी हा कदै

दिल आखै पिजरे गी जां अपना ए सिर गै भन्न  
ईखी ब' उस समें दी जो मेरा बी हा कदै

\*

मीं कोई अपने हिरखै दी छामां बठाग  
 रइ सुलकदी कसक जागे नि भाग  
 नि छुड़कन लगा उमर भर हुन ए साथ  
 इयै जैहर दिन रात लोरी सनाग  
 नि हिरखै दी बतै दे पनछानु अस  
 कलेजे प लाइ गइ ऐ ए रमज दाग  
 बछोड़े शा बी बदद ए गम दिलै दा  
 हुन ए रोग बस जिन्दू कनै गी जाग  
 मेरी बेवसी दा नि किश पुच्छो तुस  
 मनै दे ए दुखड़े कियां कोई बंडाग  
 ए साकी दी अक्ख नइ जे बदली जा झट  
 जमाने दी गरदश ऐ मरजी नै जाग  
 अजब साज जीवन बी इस धरती पर  
 जियां कोई छेड़ग उआं बजदा जाग  
 समां रंगै नां अपने लऊऐ नै मैं  
 मेरा ना कोई किन्ने तौले भुलाग

✽



कदै गल्ल कीती तां पाइ ऐठे कूना  
जदू ओठ सीते तां होइ गे बलूना

नां इस पासै चैन ऐं ते नां राम उदर  
जतां पासै झांको तुआं गम चरूना

मिगी दोस्तो मेरे हालै प' छोड़ो  
जदू थागदे तुस ए दरद होऐ दूना

जेड़ा दाग लगै तां मुशकल गै मिसदा  
मलो भाएं दूना खंगालो चरूना

चमतकार गै जे अजें साह चलै दा  
नितां दोखियें केड़ा कित्ता नि दूना

घरिसती ऐ बेशवक दुखें दा कचम्बल  
ब' अकसीर ऐ बरतो जे अकली दा पूना

ऊआं साधें गी के सुआदें नै लगा  
गलांदे जेड़े उयै तुपदे सलूना

✱

सुख आपूँ गै कनजोइ जन्दे जद दुख जोशै बिच आइ जन्दे  
बस उठदे ब्हौंदे हर बेलै हर थार फिकर गै खाइ जन्दे

आइ जन्दा हा नां साढ़ा बी जद यार कुतै दो ब्हौंदे हे  
ओ बेले चेतै औंदे गे अकखीं बिच अत्थरुं आइ जन्दे

जग कुसी ऐ मेशां अपनांदा जद रे नि सदा ए समें अपने  
सब करन सलामां चढ़दे गी डिगदे गी ठोकर लाइ जन्दे

किश मान बधी जन्दा उन्दा किश गल्ल मेरी बी रइ जन्दी  
दो पल जे साढ़ै कोल बइ ओ बिन्द असें गी स्हाइ जन्दे

दुख दसदे गै दुख कोइ बंडै तां हरज नि ऐ दुख दस्सने बिच  
अस अपने रोने रोऐ ने ओ अपने दुख समझाई जन्दे

अज इस दुनिया दी दीड़ बिच जो पिच्छें रे सो भुल्ली गे  
ए सार जेड़े बी वुज्झी गे ओ झट दुनियां पर छाई जन्दे

पुज्जे आं जदूँ अस कोल उदै किश भार गमें दा ढाने तै  
उस दी ओ लचारी दिखदे गै गम होर शुआला खाइ जन्दे

थौ के हा जे मेरे जीवन बिच इक दौर नया बी औना ऐ  
कइ जलन लगी पे लिखने पर कइ लिखने दी सोह् पाइ जन्दे

✽

सब आखन जे दिक्खना ए तेरा तमाश  
मैं इन्ना गै भाखा जे सब जग तमाशा

ए की किरन अत्थरुं किसी फुटदे हासे  
परख पारखी गी नितान सब तमाशा

मी अज आस ठगौ दी ऐ हर गइं पर  
ब' होइ सकदा कल तुस बी दिक्खो नराशा

जो खिड़दा सो सुकदा जो बनदा सो पजदा  
इबी इक तमाशा, उबी इक तमाशा

निं तुस मेरी नजरी शा ओह्लै शरीको  
थुआड़ी हर इक गैं मेरे तै तमाशा

बशक्क हस्सो दिल खोलियै दिन ओ औने  
तुसें तरसना फी बी लग्गना निं गाशा

मी निशचा मेरे उद्दमै दिन बदलने  
करो तुस बशक्क मेरे ढौने दी आशा

✱



मिगी पनत जी नै फी दित्ता ऐ आला  
 बझोंदा ऐ दाली 'च किश काला-काला  
 अज ओ कोल उन्दै चनामन नि लब्दा  
 मिगी धोखा ऐ जां समें दा खटाला  
 जे आड़ीं गै चट्टन लगी पइयां खेतर  
 तां कुन दूआ फी करग इन्दा सम्हाला  
 उदा जादू हा जां इयै बेगुरा हा  
 ब नाबर हा छट्टने तै कन ए दुआला  
 ओ बेजान बुत्तें दा मोह् करन कियां  
 जिनें मन गै मन्दर जिने दिल शिवाला  
 ए दिल लान सौखा ब उसगी नभाना  
 बड़ा रोग जिन्दू बड़ा जालो खाला  
 कुसै दै भरोसै कदू तक ए चौधर  
 कदू तक ए तुन्दा निभग दिन नकाला  
 बड़ी दौड़ लम्मी शिलपकारी जीवन  
 सदा साह्-सतै आलें दा बोल बाला

\*

इबी सेइ होआ पैरै - पैरै पर बत्तां सारियां गै कवल्लियां  
इबी सोझ ही जित्ते अंत ओ जिनें ठोकरां नित्त झल्लियां

तेरी गलियें शा मेरे ब्हेड़ें तक नि कदें बी जिन्दी भिनक पई  
उयै ब्हेड़ें, गलियें, बजार सारै गै शैहर गल्लां अज हल्लियां

दिलां तुइ सरांह, तेरी हिम्मतै गी जां किसमतै गी, समें गी मैं  
किश अजीब ऐ तेरा ए चैहकना चारै कूटां दोखियें मल्लियां

मेरे हिरखै गी कैसी निन्दै दे दना झांको अपनियां बुक्कलां  
ए ते जोत जलदी दुपासड़ै केड़ा साम्बै इक्कले वड़ल्लियां

उबी बकत हा मेरी जित्त बी मिगी बिंद नइ पतेयाइ सकी  
इबी बकत गै मेरी हार बी देऐ जीबनै गी तसल्लियां

इनें कपटी हासैं दा जाल बुनियै जो करन चाहंदे अधीन मिक्की  
तां थुड़दी रासै दै स्हारै हाम्बे ओ लान गासै गी टल्लियां

\*

नित बदलदी ऐ उन्दी नंगाह् दिक्खो  
कुत्थें पुजदी ऐ साढी बी आह् दिक्खो

जबर दिक्खी बी मुसकरा करनें  
साढे सबरै दी इनतह् दिक्खो

अस पराए ते गैर अपने सइ  
रहूँग क्रद तक ए उन्दी जफा दिक्खो

जतन साढा ऐ दिल लुटाइ देचै  
उन्दी कोशश जे कडचै लाह् दिक्खो

प्यार पूजा ऐ दुन्यादारी नइ  
दिल बी दिक्खो दिलै दी चाह् दिक्खो

लैहर सुरकै बनै तुफान, बई जा  
मेरे हिरखै दी झुगी थाह् दिक्खो

अजब उलझन ऐं जन्द निकली गइ  
साथ फी बी नि छुड़दे साह् दिक्खो

सिर तली पर लपेटे दा कप्पन  
कद्द पौदा उदे नै बाह् दिक्खो

\*



उसदा औना हा बागै 'च बहार आइ गई  
हस्सी पे चूकै-चकै 'चा फुल्ल साथियो  
भौरें दी गुन - गुनै 'च उदे गीत हे  
सारे बागै 'च पइ उसदी हुल्ल साथियो

रौंस बहारें 'च ही बहा नशीली चली  
दोहूरी हर लरज होई सिर नुआने गितै  
कंडे चुभने दी खोए गी भुल्ली गै गे  
सोहल कलियें दे खुल्ली गे बुल्ल साथियो

पैंछियें पी लइ होश अपनी निं रइ  
जीभ फड़की पइ गीत गाने गितै  
मुजतो दे बंद इनें ओठें गी थोइ गइ  
अशकें नां उसदा लैने दी खुल्ल साथियो

वकत कहुने गितै सेक-लक्खां जरे  
जानी अनजानी बत्तें प' फिरदे गै रे  
आस ही मेद ही पौग गै ना कदै  
साढ़े बैतल दिलै दा बी मुल्ल साथियो

उसदे हसमुख सभा' शा पता चलदा ऐ  
पिछले रोह् - रोसें दा उये दोशी नइ  
किश न किश कसर पूजा 'च रइ गई दी ही  
किश ते साढ़ी बी होनी ऐं भुल्ल साथियो

मोसम आए न न्हे मंगे हे मैं जन्हे  
औन लइ पे मेरे नां प' उसदे सन्हे  
अज मेरे पैंडे गी लब्बियां मनजलां  
सुफल होइ मेरी साध कुल्ल साथियो

✱

असें जुरम कित्ते जिदे चोकें उप्पर  
उये अज असें गी गुनाह् गार आखे

★

दगा बल्लें - बल्लें जफा बल्लें - बल्लें  
ए किस जुरम दी मी सजा बल्लें - बल्लें

दिनो दिन शलैपा, ए मुसकान, शोखी  
मिगी मारने दी दवा बल्लें - बल्लें

मेरी दोस्ती दा भरम रक्खने तै  
ओ लोकें 'च गल्ल मेरी लहा बल्लें-बल्लें

समें दा तकाजा ते यारें दी खेचल  
लगी पे-आं समझन वफा बल्लें - बल्लें

मेरा गम निहा अपनी दिलजोइ खातर  
ओ बोले जे कहानी सना बल्लें - बल्लें

मनां रोंदा रहूंगा कदू तक ए रोने  
जिनें तुइ भुलाया भुला बल्लें - बल्लें

ए दिल, उन्दे लारें दी अनसम्ब बरकत  
भरोची गया तौकड़ा बल्लें - बल्लें

इदी हिम्मत ऐ जां उदा पैर थिड़या  
खुदी हुन्दी जा दा खुदा बल्लें - बल्लें

\*



कल तेरी गैहली जो आया मैं निहा कोइ होर हा  
 जिस नै तेरा दिल दुखाया मैं निहा कोइ होर हा  
 किसमत दे रोसे बेशक्क मी स्तांदे रे मगर  
 तेरे रोसें दा सताया मैं निहा कोइ होर हा  
 जिन्दगी मेरे गितै सुनसान सइ इक भार सइ  
 जिन्दगी पर भार पाया मैं निहा कोइ होर हा  
 ए चुपासै खिड़दी कलियां, फल्ल, ब्हारां, ताजगी  
 ए समां जिस नै गुआया मैं निहा कोइ होर हा  
 जिसनै हर थां जिन्दगी दा गीत गाया हा मीएँ  
 जिन्दगी नै दिल नि लाया मैं निहा कोइ होर हा  
 मेरे हासे वी कुसै गी चुबदे होइन, हासा गै  
 जिस दे हासै लऊ सकाया मैं निहा कोइ होर हा  
 ए अवारापन मेरा खरमस्ती सब अपने लइ  
 जिस दी गल्लें तुइ डरायां मैं निहा कोइ होर हा  
 लगन, रस्ता, मनजल इक्कै फरक गइं दा दोस्तो  
 गै धरी जो डगमगाया मैं निहा कोइ होर हा  
 कोल तेरै भिक्ख मंगन आया झोली अड्डियै  
 बेहम तिककी, कुन गलाया, मैं निहा कोइ होर हा

\*

उनै बेले उपपर भुआइ लइयां नजरां  
मिगी कोइ दस्सो मैं दिल कियां बदलां

बदलना हकीकत ब' ए जुग अनोखा  
कदै इयां बदले नां मानु, नां कदरां

बधी जा दी उपजै दै कन्नै हिरस बी  
अजब दौर लगगा हफी गइयां अकलां

तदू गै मेरे पैरें तोसे कुरस्ते  
जदू बी ए मिलियां न दिलदार शकलां

बने-ओ जे नेता तां राहू नेक दस्सो  
जे गौहू करन तुन्दे प' कल सब गै नसलां

हर इक चीज ब्हारै 'प गै शैल लब्दी  
कदू तोड़ चढ़ियां न बिन ब्हारै फसलां

छड़ा खुट्टु ऐ तां इन्नी सज-धज ते नखरा  
तगाने लटो नइं ए नकलां न नकलां

जेड़े आखदे फिरदे हे गजल के ऐ  
बड़ी रहूतगी अज उबी लिखन गजलां

✱



अंत इन् पेंडें दा ओड़क होग गै

गैं पटोई गई ऐ तां मनजल थोग गै ।

ईखियें मैह्, फल भजाई आसैं नजरां गड्डियां


रौ उदा अजकल नि तांह्, कल होग गै ॥











### पहले प्रकाशन

- ★ नमी कविता-नमे रस्ते २.२५
- ★ धुखदे गोहूटे ३.२५
- ★ ठारमां रोज ३.५०

मिलने  
दा  
पता

नरसिंहदेव जम्वाल  
कमला प्रकाशन भलवाल, जम्मू  
जां  
डोगरी संस्था, पक्का डंगा जम्मू



डोगरी पद्य साहित्य 'च गजलै  
 दी बरेस अजें मसां छे-सत बरे ऐ ।  
 इस थोड़े न्हे समें 'च जेड़ियां गजलां  
 आख्यां गइयां न उनें सारिये' दा  
 अध्ययन करने परैन्त कोई नराशा नइं  
 होग । परमान ऐ नरसिंहदेव जम्वाल  
 हुन्दा 'ए गजल संग्रह' जिसी पढ़ने  
 प्रैत इस सच्चाइ गी मन्ननै पौंदा ऐ  
 जे जम्वाल होरें गजल आखने 'च  
 अपनी योग्यता ते सरोखड़-पुने गी  
 प्रसिद्ध करने आस्तै सफल जतन कित्ते  
 दा ऐ ।

उनें अपनी गजलें 'च जित्थें  
 गजलै दे सारे कलात्मक बंधनैं दा  
 सहज-सभा' कन्नै आदर-मान कित्ते  
 दा ऐ उत्थें नमी कदरें (मूल्य) गी  
 बी बड़ी डूगी नजरी कन्नै नापे तोले  
 दा ऐ । इदे कन्नै उन्दे शेअरें 'च  
 कला दी पवंदी, आखने 'च रोचकता  
 ते भाषा दी सरलता दे कन्नै-कन्नै  
 सोचें 'च नवीनता, भाव सम्बंधी  
 उत्सुकता, जिन्दगी दी डलक ते दुनियां  
 दी झलक थां-थां लशकारे मारदी  
 ऐ ।

मिगी यकीन ऐ जे डोगरी दा ऐ पैहला  
 गजल-संग्रह डोगरी पद्य-साहित्य 'च  
 इक रोचक बादा साबत होग ।

आबिद मनावरी

१५ अगस्त-१९६८